

# Cart De'en Nyoj Par Benə' Ebreo Ca'

Diozən' babe'elene' chio'o dižə'  
ca de'en bsele'e Xi'ine'enə'

**1** Tyemp de'en bagwde, Diozən' bsele'e zan profet benə' gwsə'e xtiže'enə' len de'e xaxta'ocho ca'. Zan las profet ca' gwsə'e xtiže'enə' len de'e xaxta'ocho ca', nža' nža' can' gwsə'en. <sup>2</sup> Pero tyemp nga zocho na'a nža'alə babene'. Na'a babe'elene' chio'o dižə' ca de'en bsele'e Xi'ine'enə' ben' ben yoban', yežlyon' na' de'e ca' chle'icho le'e yoban', na' bengə'aque'en con can' ben Diozən' mendad. Na' gwžin ža catə' gaquə lao na Xi'in Diozən' yoguə' benəch, yoguə' bia ca' chsa'aš, na' biquə'əchlə de'e ca' bene'. <sup>3</sup> Xi'in Diozən' nse'e doxen yełə' chey che'eni' che Xe'enə' na' cayanə'an naquə yichjla'aždao' Xe' Dioz nan' naquə yichjla'aždaogüe'enə'. Na' Xi'in Diozən' chone' par ničh yoban', yežlyon' na' de'e ca' chle'icho le'e yoban' chso'onən žin, čhedə' nape' yełə' guac par ničh chac con can' ne'enə'. Bsanlažə' cuine' gwsə'ot benə' le' par ničh chnitlaogüe' xtolə' yoguə' chio'o chonlilažə'əchone'. Na' gwde na' beyepe' yoban' zjəyechi'e cuit Xe' Diozən' ben'

naquə le'ezelaogüe benə' zaque'e  
par chnabi'e txen len le'.

Xi'in Diozən' naquəche' benə'  
zaquə'əche cle ca angl ca'

<sup>4</sup> Na' nla'alao de que Xi'in Diozən' naquəche' benə' zaquə'əche cle ca angl ca', čhedə' Diozən' babnežjue'ene' yełə' bala'an mazəchlə ca de'en babnežjue' angl ca'. Na' babene' par ničh naquəche' benə' blaoch. <sup>5</sup> Diozən' bitonə' ye'e ni tozə angl can' gože' Xi'ine'enə', gože'ene':

Len' naco' xi'ina'.

Neža babena' par ničh solao  
nabi'o len nada'.

Na' nic ne'e güe'e dižə' che notə'əteza  
angl can' gwne' che Xi'ine'enə', gwne':

Nada' gona' par ničh gacbia'  
naca' Xe',

na' gona' par ničh gacbia' de  
que naque' Xi'ina'.

<sup>6</sup> Xi'in Diozən' naque' le'ezelaogüe  
benə' zaque'e. De'e na'anə' catə'an  
Diozən' bsele'ene' yežlyon' gwne':

Yoguə'əlol angl čhia' ca' cheyalə'  
əso'elaogüe'ene'.

<sup>7</sup> Nach gozne' che angl ca':

Chona' par ničh angl čhia' ca'  
benə' ca' chso'on mendad  
čhia'

chs'a'aque' ca be' de'en chechj  
na' ca yi' beļ.

<sup>8</sup>Na' nža'alā can' be'e dižā' len  
Xi'ine'enā' gože'ene':

Len' naco' Dioz na' chnabi'o  
zejlicane.

Na' lechgualē güen chnabi'o.

<sup>9</sup>Chebeido' de'en zda liča na'  
chgue'ido' de'e malān'.

De'e na'anā' nada' Diozān' ben'  
cho'elaogo'o

babena' par ničh zocho'  
mbalazāch cle ca beņā'  
ļjuežjo' ca'.

<sup>10</sup>Na' de'e yoblē gož Diozān'  
Xi'ine'enā':

Le' naco' Xan yežlyon'.

Len' beno'on ža gwlasda'ote.

Na' yoguā' de'en chle'icho le'e  
yoban', leczā len' beno'on.

<sup>11-12</sup>Na' gwžin ža catā' te che yoguā'  
de'en chle'icho le'e yoban' na'  
yežlyo nga.

Pero le' bito te čhio'; syempr  
soczo' zejlicane.

Na' gwša' le'e yoban' na'  
yežlyon' ca to beņā' chša'  
xe' catā' babeyoin na' chaze'  
yeton.

Gono' len le'e yoban' na'  
yežlyon' can' chon to beņā'  
catā' chetobā xe'.

Pero le', tozāczā can' gaco'  
zejlicane, na' bito āžin iz  
nacho te čhio'.

<sup>13</sup>Diozān' bitonā' ye'e ni to angl ca  
de'en gože' Xi'ine'enā', gože'ene':

Gwche'edo' cuita' nga nabi'acho  
txen,

na' gona' par ničh nitā' de'e  
ca' chso'on contr le' na' beņā'  
contr čhio' ca' xni'onā'.

<sup>14</sup>Ca naquā angl ca', yogue'e  
zjānaque' beņā' chso'on mendad  
che Diozān', chsele'e lega'aque' par  
chs'a'aclene' chio'o bagwlej Diozān'  
par ničh žjāyecho len le'.

**Cheyaļā' āgwzenagcho che xtižā'  
Diozān' par ničh žjāyecho len le'**

**2** Na' laogüe de'en naquā Xi'in  
Diozān' beņā' blaoch na' beņā'  
zaquā'ēche ca angl ca', do yichj do  
lažā'ēcho cheyaļā' āgwzenagcho  
xtiže'enā' de'en babenecho, čhedā'  
la' šā bito āgwzenagcho čhei do  
yichj do lažā'ēcho, guanlažā'ēchon  
na' cuejyichjchon. <sup>2</sup>Lei che  
Diozān' de'en gosā'āyixjue'e angl  
ca' naquāczān de'e žialao xen.  
Na' de'e na'anā' Diozān' bnežjue'  
castigw che de'e xaxta'ocho ca'  
batā'ātezā cui boso'ozenague' čhei  
segon de'e mal de'en gwso'on to  
toga'aque'. <sup>3</sup>Na' naquān segor de  
que Diozān' gone' chio'o castigw  
šā bito goncho can' na Xancho  
Jesocristān'. Zgua'atec Xancho  
Jesocristān' be'e dižā' güen  
juisy can' cheyaļā' goncho par  
ničh žjāyecho len le'. Nach  
gwdenā' beņā' ca' gosā'ādalen le'  
leczā boso'ozejni'ine' chio'o can'  
gwne'enā', čhedā' gosā'ānezene'  
de que naquān güen. <sup>4</sup>Na' Diozān'  
bene' par ničh gwso'one' milagr  
na' bichlā de'e zaquā' yebanecho,  
na' Diozān' bnežjue' lega'aque'  
zan clas yelā' guac, na' Spirit  
čhe'enā' benān par ničh gwso'one'  
de'e zan de'e güen len yelā' guac  
čhein' segon can' gwyazlažā'  
Diozān', par ničh ānezecho de que  
xtižā'āga'aque'enā' naquān de'e li.

**Goc Jeso'osən' doxen can'  
naquə chio'o beṇaḥ**

<sup>5</sup>Catə' te che yežlyo nga na' gatə'  
yežlyo cobə de'en cho'a dižə' chei,  
Diozən' bito gone' ca yesə'anabia'  
angl ca'. <sup>6</sup>Na' nyoj can' gwna de'e  
Rei Dabin' gože' Diozən':  
    ¿Bixchen' chacdo' che  
    beṇaḥən'? ca naquə bitotec  
    bi zjəzaque'e.  
Na' ¿bixchen'  
    chaclega'aco'one'?

<sup>7</sup>Beno' par niḥ beṇaḥən' bito  
zjənaque' beṇə' blao can'  
zjənaquə angl ca' pero caguə  
syempr gaquən ca'.  
Bia'aczə beno' par niḥ  
zjəzaquə' beṇaḥən' na'  
bnežjwga'aco'one' yeḷə' bala'an.

<sup>8</sup>Beno' par niḥ yoguə'əloḷte  
de'e zjəde əsa'acquən lao na'  
beṇaḥən',  
na' len yoguə'əloḷ bia ca'  
chsa'aš, leczə əsa'acquəb lao  
na'aga'aque'.

Na' ca naquə ben Diozən' par niḥ  
yoguə'əloḷte de'e zjəde əsa'acquən  
lao na' beṇaḥən' na' yoguə' bia  
ca' chsa'aš leczə əsa'acquəb lao  
na'aga'aque', de'e na'anə' beṇaḥən'  
yesə'anabi'e lao yoguə'əte de'en  
zjəde, la'anə'əczə na'a nezecho  
bitonə' yesə'anabi'e. <sup>9</sup>Na' ca naquə  
Jeso'osən', žlac goque' beṇaḥ bito  
goque' beṇə' blao can' zjənaquə  
angl ca'. Na' de'e tant nži'ilazə'  
Diozən' chio'o beṇaḥ bene' par  
niḥ Jeso'osən' bsanlažə' cuine' por  
ni checho catə'an gwsot beṇə' le',  
na' de'e na'anə' Jeso'osən' banzi'e  
yeḷə' bala'an xen na' banaquəchgüie'  
beṇə' zaque'e.

<sup>10</sup>Diozən' bene' bia chsa'aš, bene'  
beṇaḥ na' yeziquə'əchlə de'e zjəde  
par niḥ chzi'e yeḷə' bala'an. Na'  
bene' güen ca de'en bsi'e xneze par  
niḥ gwxaquə'əzi' Jesocristən' ben'  
babebej chio'o xni'a de'e malən'.  
Na' de'en gwxaquə'əzi'enə' chac  
chone' par niḥ beṇə' zan əsa'aque'  
xi'iṇ Diozən' na' žjəsyə'anite'e len  
le' yoban'. <sup>11</sup>Jeso'osən' bagwleje'  
chio'o par naccho lažə' na' Diozən'.  
De'e na'anə' txen len le' naccho  
xi'iṇ Diozən' na' bito cheto'ine' par  
əne' che chio'o de que naccho beṇə'  
biše'e na' beṇə' zane'. <sup>12</sup>Quinga  
gwna Jeso'osən' gože' Diozən':  
    Gua'a dižə' par niḥ beṇə'  
    biša'a ca' na' beṇə' zana' ca'  
    yesə'əneze'ne' non' naco'.  
Na' lao zjəndopə zjənžague'  
    chso'elaogüie'e le',  
    nada' gua'a dižə' ca beṇə'  
    güennə' naco'.

<sup>13</sup>Nach gwne':  
    Sotezə soa' gonlilažə'a Diozən'.  
Na' de'e yoblə gozne':  
    Nga zoa' txen len beṇə' ca'  
    beṇ Diozən' nada' par niḥ  
    zjənaque' xi'iṇa'.

<sup>14</sup>Na' chio'o naccho beṇə' belə'  
chen, chio'onə' naccho xi'iṇe'.  
De'e na'anə' leczə le' golje' goque'  
beṇə' belə' chen na' bsanlažə'  
cuine' gwsot beṇə' le' par  
niḥ bnitlaogüie' yeḷə' gwnabia'  
che gwxiye'en de'en chon par  
niḥ chatcho. <sup>15</sup>Bene' par niḥ  
chio'o chonlilažə'əchone' bitoch  
žebcho gatcho. Beṇə' ca' cui  
chso'onlilažə'ene' syempr  
chəsə'əžebe' sa'ate'. <sup>16</sup>Jeso'osən'  
bide' yežlyo nga caguə par goclene'  
angl ca', sino par goclene' beṇə'

ca' chso'onlilažə' Diozən' can' benlilažə' de'e Abraanə' Diozən'.  
 17 Benən byen goc Jeso'osən' doxen can' naquə chio'o benəch par niç ca' chaclene' chio'o lao Diozən' can' gws'o'on de'e bəxoz əblao ca' len de'e xaxta'o chio'o benə' Izrael gwsa'aclene' lega'aque'. Cheyašə' cheži'ilazə' Jeso'osən' chio'o na' chone' complir can' ne'enə'. Can' chon Jeso'osən' be'enə' checa'a xtolə' chio'o chonlilažə'əchone'.  
 18 Jeso'osən' cuat bene' de'e mal pero bəzaglaogüe' catə'an gwlo'oyelə' gwxiye'en le' par gone' de'e malən' na' catə' goc bitə'ətezəchlə de'e mal len le'. De'e na'anə' nezene' naclən' chone' chaclene' chio'o catə' chgo'oyelə' gwxiye'en chio'o par goncho de'e malən' na' catə' chac bitə'ətezə de'e mal len chio'o.

**Jeso'osən' zaquə'əche' cle  
ca de'e Moisezən'**

**3** Benə' bišə', laogüe de'en bagwlej Diozən' yoguə' chio'o par naccho lažə' ne'enə', cheyalə' goncho xbab che Cristo Jeso'osən' ben' bselə' Diozən' par naque' bəxoz əblao checho. Diozən' bsele'ene' bedətiçjui'e xtiže'enə' de'en chejle'echo chei. 2 Diozən' gwleje' le' par chaclene' chio'o ca to bəxoz əblao. Na' Jeso'osən' lao bide' yežlyon' na' na'a chone' con can' na Diozən', ca'aczən' ben de'e Moisezən' ben' leczə goclene' yoguə' benə' gwsa'ac family che Diozən'.  
 3 Pero na' Jeso'osən' zaquə'əche' cle ca Moisezən'. Jeso'os na'anə' bəxie' family che Diozən' ca de'en bene' par niç chio'o chonlilažə'əcho Diozən' na'a na' len benə' ca'

gws'o'onlilažə' le' cana' naccho family che Diozən'. Na' ca naquə de'e Moisezən' ža, goque' con to benə' lao family che Diozən'. 4 Na' gwnitə' benə' bəxe to to family nitə' lao yežlyon', pero Jeso'osən' caguə bəxie' family che Dioz na'azən', sino leczə bəxie' yoguə'əte de'e zjəde, chedə' len' naque' Dioz. 5 Na' ca naquə de'e Moisezən', bene' can' gwna Diozən' par goclene' yoguə' benə' gwsa'ac family che Diozən' la'anə'əczə goque' con to xmos Diozən'. Na' de'e Moisezən' be'e dižə' che de'e ca' ze'e əsa'ac ca tyempən' de'e ca' bagwsa'acquən na'a. 6 Cristən' leczə bene' complir can' gwna Diozən' par goclene' benə' zjənaquə family che Diozən'. Na' bene' ca' chedə' naquəczə' Xi'in Diozən', caguə ca to mos. Na' family che Dioz na'anə' naquə chio'o šə zotezə zocho chonlilažə'əcho Diozən' do yiçhj do lažə'əcho catə'an yidə Cristən' de'e yoblə, na' šə chebeicho de'en yidə Cristən'.

**Guaquə socho mbalaz len Diozən'**

7-8 Cheyalə' goncho xbab can' gwna Spirit che Diozən' de'en nyojən nga:

Catə' Diozən' əne' to de'e gonle na'a,

bito gacle benə' godenag can' gwsa'ac benə' Izrael ca' cana' catə' gws'o'one' contr Diozən' latjə dašən'.

Gws'o'one' prueb šə leine' de que gwnežjue' castigw chega'aque'enə'.

9 Nach Diozən' gwne':

De'e xaxta'ole ca' bito gwse'ejle'e chia' la'anə'əczə

choa iz besə'ələ'ine' de'e ca'  
bena' par goquələnga'aca'ane'.  
Con gwsə'one' prueb šə  
leida'anə'.

<sup>10</sup> De'e na'anə' bito  
bebeiga'acda'ane',  
na' gwnia': "Do tyemp  
naquəga'aque' beṇə'  
yichjla'aždao' žod,  
bitonə' se'enene' se'ejni'ine' can'  
chona'."

<sup>11</sup> Na' de'en bža'a lega'aque' de'e  
nan' gwnia' chega'aque' de  
que cuat nite'e mbalaz len  
nada'.

<sup>12</sup> Legapə ciudad beṇə' bišə',  
par nič ni tole cui gacle beṇə'  
yichjla'aždao' mal. Lesotezə lesə  
legonlilažə' Diozən' par nič cui  
cuejyichjlene' chedə' le'enə' zoe'  
zejlicane. <sup>13</sup> Žlac na'a ne'e de  
tyemp par əgwzenagle che Diozən',  
legwtiplažə' ljuəžjle tža tža par  
nič cui gonle de'e malən', la' catə'  
choncho de'e malən' chxoayaguən  
chio'o par nič cui bi bi  
chaquecho catə'an chonchchon.

<sup>14</sup> Ngodə'əcho txen len Cristən' šə  
ne'e zotezə zocho chonlilažə'əchone'  
catə'an yide' de'e yoblə con can'  
gwzolaoczocho chonlilažə'əchone'.

<sup>15</sup> Na' nyoj Xtizə' Diozən' par  
chio'o gan' nan:  
Catə' Diozən' əne' to de'e gonle  
na'a  
bito gacle beṇə' godenag can'  
gwsa'ac beṇə' Izrael ca' cana'.

<sup>16</sup> Na' de'en nyojən nan ca' cho'en  
dižə' che beṇə' ca' jəsyə'ənao  
de'e Moisezən' catə'an jəyeleje'  
lega'aque' Egipton'. Boso'ozenague'  
can' ben Diozən' mendad par  
besyə'əchoje' Egipton', pero

beyožzə besyə'əchoje'enə' bitoch  
boso'ozenague' che'. <sup>17</sup> De'e  
na'anə' bže'e lega'aque' choa iz  
de'en gwsə'one' de'e malən' cuič  
boso'ozenague' che', na' gwsa'ate'  
latjə dašən'. <sup>18</sup> Na' Diozən' gwne'  
de que cuat nite'e mbalaz len le'  
chedə' cui boso'ozenague' che'.  
<sup>19</sup> Na' nezecho de que yelə' godenag  
chega'aque'enə' cui goquə nite'e  
mbalaz len le'.

**4** Na'a ža, nezecho can' goc che  
beṇə' godenag ca' beṇə' ca'  
gwsa'at latjə dašən'. De'e na'anə'  
cheyałə' žebcho par nič cui goncho  
can' gwsə'one'enə', chedə' šə goncho  
can' gwsə'one'enə' bito gaquə socho  
mbalaz len Diozən' can' bene' lyebe.  
<sup>2</sup> Babenecho to dižə' güen dižə' cobə  
de que guaquə socho mbalaz len  
Diozən' ca dižə' de'en gwse'ene  
lega'aque'. Pero ca naquə lega'aque'  
de'en cui gwse'ejle'e chei, de'e nan'  
bito goquəlenən lega'aque'. <sup>3</sup> Na'  
chio'o chejle'echo che de'en na  
Diozən' bazochə mbalaz len le'. De'e  
na'anə' bito na Diozən' checho can'  
gwne' che beṇə' ca' gwne':

De'en bža'a lega'aque' na' gwnia'  
de que cuat nite'e mbalaz len  
nada'.

Na' ca naquə Diozən' nezecho  
babeyož bxie' yoban' na' yežlyon'  
na' de'e na'anə' zoe' mbalaz. <sup>4</sup> Can'  
nyoj to part Xtizə'enə' nan:

Xop ža ben Diozən' yoban',  
yežlyon', beṇəchan', bia  
yixə'an na' biquə'əchlə de'e  
zjəde.

Na' catə' bžin ža gažən', bitoch  
bi bi bene', con zoe' mbalaz.

<sup>5</sup> Na' de'e yoblə goncho xbab che  
de'en gwne':

Cuat nite'e mbalaz len nada'.  
 6De'e li balə beṇə' nite'e mbalaz len Diozən'. Pero ca naquə beṇə' ca' gwse'enene' dižə' güen dižə' cobə che'enə' cana'ate, bito goquə nite'e mbalaz len le' chedə' bito boso'ozenague' che'. 7Na' catə' bagwde zan iz Diozən' gwne' de'e yoblə de que gwaquə nitə' beṇə' mbalaz len le'. Bene' par niç bzoj de'e Rei Dabin' dižə de'en na:

Catə' Diozən' əṇe' to de'e gonle na'a bito gacle beṇə' godenag.  
 8De'e Josuen' gwche'e de'e xaxta'o chio'o beṇə' Izrael gan' gosə'əzi'e yežlyon' de'en bnežjw Diozən' lega'aque'. Pero lega'aque' bito gwnite'e mbalaz len Diozən'. De'e na'anə' gwdechlə Diozən' bene' par niç de'e Dabin' bzoje' gwne' de que gwžin ža nitə' beṇə' mbalaz len le'. 9Nachən' nezecho de que chio'o chonjilažə'əcho Diozən' chac socho mbalaz len le'. 10Na' beṇə' ca' banitə' mbalaz len Diozən' bitoch chso'one' can' na xbab chega'aque'enə', sino que chso'one' can' na Diozən'. De'e na'anə' nacho de que nite'e mbalaz can' zo Diozən' de'en beyož bxie' yoguə de'e ca' zjəde. 11Na' cheyalə' yeyiljažə'əcho nac goncho par niç socho mbalaz len Diozən'. Cheyalə' gwzenagcho che' par niç ca' ni tocho cui gac checho can' goc che de'e xaxta'ocho ca' de'en cui boso'ozenague' che Diozən'.

12Xtižə' Diozən' chazən lo'o yichjla'aždao' beṇə', na' chaclenən notə'ətezə choso'ozenag chei. Na' gwxaquə'əleben ca to spad de'en nlachgua çhopə la'ate. Pero mazəchlə can' chon to spad chon

Xtižə' Diozən', chedə' chlō'in chio'o no chein' chzenagcho, əche Spirit che Diozən' o šə che la'ažda'omalchon'. Leczə ca' chzejni'in chio'o che xbab de'en yo'o lo'o yichjla'ažda'ochon' na' che yoguə'əlo' de'en chzelažə'əcho šə naquən güen o šə naquən mal. De'e na'anə' gwxaquə'əleben ca to spad de'e chçog entr beçhj bnia ca' na' entr bin ca'. 13Diozən' neze nle'ine' to to beṇəçh, na' to to angl, na' to to de'e xio', na' cuantzə bi de'en zjəde. Diozən' neze nle'ine' yichjla'ažda'ochon'. Na' laogüe' na'anə' əgwdecho cuent šə biquə' de'e babencho.

#### Jeso'osən' naque' bçox əblao chechon'

14Jeso'os Xi'in Diozən' babeyepe' yoban' gan' zo Diozən' par gaquəlene' chio'o. De'e na'anə' Jeso'osən' naque' bçox əblao checho, ben' naquə le'ezelaogüe beṇə' zaque'e. Na' de'e na'anə' cheyalə' sotezə socho gonjilažə'əchone' can' chonczcho. 15Na' Jeso'osən', ben' naquə bçox əblao chechon', chacbe'ine' catə' chaquecho zdebə goncho to de'e güen. Gwxiye'en gwlo'oyelə'ən le' gone' de'e mal pero bito bene'en na' bžaglaogüe' cayanə'ən chžaglaio chio'o beṇəçh. 16Na' cheyalə' güe'elencho Diozən' dižə' sin cui žebcho, əṇabechone' yezi'ixene' checho na' gaquəlene' chio'o batə'ətezə chyažjecho yelə' chaclen che'enə', chedə' le'enə' nži'ilažə'e chio'o.

**5** Beṇə' ca' besə'əchoj gwsa'aque' bçox əblao che nasyon Izrael chechon' tyemp

de'en bagwde jso'e bi de'en jso'e lao Diozən' na' gws'o'ote' bia yixə' besə'əlalje' xchenga'acquəbən' par niçh Diozən' bezi'ixene' xtolə' de'e xaxta'ocho ca'. Na' yoguə' bχoz ca' gwsa'aque' con to beṇə'. <sup>2</sup>Na' bχoz əblao ca' gwsa'ape' yelə' chxenləžə' len beṇə' ca' cuiṇə' se'ejni'i can' cheyalə' so'one' na' len beṇə' ca' bazjənxoayag len de'e malən', çhedə' leczə beṇəçhən' zjənaque' na' naquən zdebə par so'one' de'e güenṇə'. <sup>3</sup>Na' de'en zjənaque' beṇəçhən' benən byen gws'o'ote' bia yixə' na' besə'əlalje xchenga'acquəbən' par gosə'əṇabe' yezi'ixen Diozən' xtolə'əga'aque'enə' can' gosə'əṇabe' yezi'ixene' xtolə' beṇə' ca' yelə'.

<sup>4</sup>Na' notono gwlej cuine' par gaque' bχoz əblao, sino Diozən' gwlejga'aque' can' gwleje' de'e Ronṇə'. <sup>5</sup>Le'egatezə ca' Cristən' bito ben cuine' xen cuejlize cuine' par gaque' bχoz əblao. Diozən' gwleje'ene' na' Dioz na'anə' gože'ene'!

Len' naco' Xi'ina'.

Neža babena' par niçh solao  
nabi'o len nada'.

<sup>6</sup>Na' ga yoblə nyoj yeto de'en gože'ene'!

Naco' bχoz beṇə' zo zejlicane,  
na' naco' ca bχoz

Melquisedequən'.

<sup>7</sup>Na' Jeso'osən' catə' gwzoe' yežlyo nga bene' orasyon lao Xe' Diozən' ben' gac yosle'ene' par niçh cui gate'. Jeso'osən' gwne' zižjo na' gwcheže' gwnabe' yelə' chaclen çhe', na' Diozən' bzenague' na' bene' par niçh yelə' gotən' cui gwnabi'an le' çhedə' benlilaže'ene'.

<sup>8</sup>Na' la'anə'əczə Jeso'osən' naque' Xi'in Dioz, Diozən' bzejni'ine' le' de que cheyalə' əžaglaogüe' par yeyož gone' yoguə'əlol de'e ca' naquən gone'. De'e na'anə' Jeso'osən' bžaglaogüe' len yoguə'əlol de'en goc çhe' yežlyo nga. <sup>9</sup>Na' beyož goc çhe' Jeso'osən' yoguə'əlol can' gone'e Diozən', nach gwzoloa chone' par niçh yoguə'əlol beṇə' ca' choso'ozenag çhe', nite'e len le' zejlicane. <sup>10</sup>Diozən' gwleje' le' par naque' bχoz əblao çecho na' gwxaquə'əlebene' ca bχoz Melquisedequən'.

**Gapcho cuidad par niçh cui  
cuejyichjcho xtižə' Diozən'  
de'en bachejle'echo çhei**

<sup>11</sup>Na' ne'e dech de'e zan de'en che'enda' əṇia' le'e çhe de'en naquə Jeso'osən' bχoz çechon', pero naquən zdebə əṇi'an par šejni'ilen, çhedə' bitoch chebeile gwzenagle çhe Diozən'. <sup>12</sup>Bagolə' əgwsed əgwlo'ile beṇə' yeziquə'əchlə xtiže'ene', pero latje de'e gonle ca', chyažjele to beṇə' par əgwsed əgwlo'ine' le'e de'e yoblə ca de'en babsedle de'e nechən'. Na' laogüe de'en chyažjele əgwsedəchle de'e ca', gwxaquə'əlebele ca bidao' ca' ne'e chsa'ažə', bi'i cuiṇə' gac sa'o. <sup>13</sup>Na' ben' naquə ca bidao' ne'e chažə', bitoṇə' šejni'ine' xtižə Diozən' de'en naquəch zdebə. <sup>14</sup>Na' xtižə' Diozən' de'en naquəch zdebə gwxaquə'əleben ca yelə' guao de'en chao beṇə' cha'o. Na' beṇə' ca' chse'ejni'i len chsa'acbe'ine' çhe bitə'ətezə dižə šə naquən de'e li o šə naquən dižə' güenləžə'. Chsa'acbe'ine' çhedə' la'

bazjəyo'olaogüe' choso'ozenague'  
che Diozən'.

**6** Na' ca bidao' ca' chəsə'əzolao  
chsa'obo' yelə' guao  
catə' bazjəncha'obo' ca'aczən'  
chio'o cheyalə' solaocho cue'  
yichjcho che xtižə' Diozən' de'en  
naquəch zdebə par nič gaquəch  
yichjla'ažda'ochon' can' naquə  
yichjla'aždao' Cristən'. Catə'ən  
gwzoloa benlilažə'əcho Cristən'  
gwejni'icho can' yedinjecho  
xtolə'əchon' na' bedinjecho. Na'  
na'a bitoch chyažjən yedinjecho che  
de'e ca' de'e yoblə, na' nic chyažjən  
yezoloa cho gonlilažə'əchone' de'e  
yoblə. <sup>2</sup>Banezczecho bi zejen  
catə'ən chcho'acho nisən', na'  
leczə can' banezecho bi zejen  
catə'ən chxoā na'achon' yichj beṇə'  
yoblə chnabcho yelə' chaclen che  
Diozən' par lega'aque' na' bitoch  
chyažjən no gwzejni'iche chio'o bi  
zeje de'e ca'. Le'egatezə ca' bitoch  
chyažjecho no gwzejni'iche chio'o  
can' yolis yosban Diozən' beṇə'  
guat ca' o can' gone' yelə' jostis  
che beṇə' ca' chso'on de'e malən'.  
Banezcze ga'aquechonṇə'. <sup>3</sup>Pero  
na'a ža, šə Diozən' güe'e latjə  
yeyiljlažə'əcho nac goncho par  
nič gaquə yichjla'ažda'ochon' can'  
naquə yichjla'aždao' Cristən'.

<sup>4</sup>Nitə' beṇə' bachselejni'i xtižə'  
Diozən' na' bazjənape' yelə' mban  
zejlicane de'en choṇ Diozən'  
chio'o chonlilažə'əchone', na'  
leczə ca' bazo Spirit che Diozən'  
lo'o yichjla'ažda'oga'aque'enə'.  
<sup>5</sup>Bazjənezene' ca güenṇə' naquə  
xtižə' Diozən' na' bazjənombi'e  
milagr na' bichlə yelə' guac  
che Diozən' la'əṇə'əczə ze'e

yesə'əle'ichene' yelə' guac  
de'en gwlo'ecche' catə' əžin  
ža gatə' yežlyo cobə. <sup>6</sup>Na' šə  
gwžinclə ža yesə'əgue'i beṇə'  
ca' Diozən' šə yesə'əbejyichjcle'  
xtižə'enə', bitoch gaquə  
yesyə'ədinjene' xtolə'əga'aque'enə'  
de'e yoblə, chedə' lo'o  
yichjla'ažda'oga'aque'enə' so'one'  
txen len beṇə' ca' boso'oda' Xi'in  
Diozən' le'e yag corozən', na'  
so'one' par nič beṇə' yeziquə'əchlə  
leczə yesə'əgue'ine' le'. <sup>7</sup>Ca  
naquə yežlyo güen gan' chsa'az  
beṇə', šə chacchgua yejon', nach  
chac de'en chsa'aze'enə' na'  
chata' de'en chəsə'əyažjene',  
na' Diozən' chebeine' de'e chac  
cwseš chega'aque'enə'. Can'  
gwxaquə'əlebecho šə zotezə zocho  
chzenagcho che Diozən'. <sup>8</sup>Pero šə  
bagwlejiyichjcho cuich chzenagcho  
che Diozən' gwxaquə'əlebecho ca  
yežlyon' gan' chlā'ac por yag yešə'  
na' no yixə' cuan de'e cui chac  
gaocho. Yežlyon' de'en nac ca' bito  
bi bi zaquə'ən par xan yežlyon',  
nach chbejiyichje'en na' chžin  
ža catə' chzeye' de'e ca' chla'ac  
laogiennə'.

**Zotezə zocho chonlilažə'əcho Diozən'**  
**chedə' nezecho žjəyecho len le'**

<sup>9</sup>Na' ca naquə le'e, la'əṇə'əczə  
babi'a dižə'ən ca', chacda' chele,  
na' zoa' segor bito gonle can'  
bagwnia' chso'on beṇə' ca'. Nezdə'  
gonšgacze can' cheyalə' goncho  
laogüe de'en babebej Diozən' chio'o  
xni'a de'e malən'. <sup>10</sup>Diozən' naque'  
beṇə' güen. Na' bito ganlaže'e  
can' babenle xšine'enə', na' can'  
ne'e chonczen na'a chaclenle



yeziquə'əchlə beṇə bagwleje' par zjənaque' lažə' ne'enə', chonlen laogüe de'en chaquele che'enə'.

<sup>11</sup>Nezele žjəyezole len Cristən'. Na' de'e na'anə' yedote žlac cuiṇə' yide' de'e yoblə cheyalə' cue' yichjle de'en žjəyezole len le', can' bachi' yichjle na'a par chaclen ljuežjle.

<sup>12</sup>Bito gacle beṇə' godenag len xtižə' Diozən'. Legonlilažə' Diozən' can' bagwso'on beṇə' ca' bagwnitə', beṇə' ca' gosə'əzi' de'en ben Diozən' lyebe əgwnežjue' lega'aque'. Lə'anə'əczə cui gosə'əzi'en cate, con gwso'onlilažə'əteze'ene'.

<sup>13</sup>Diozən' bene' lyebe de que xi'in dia che de'e Abraannə' əsa'aque' beṇə' zan. Na' de'en naque' Dioz na' notoch no no nla' beṇə' yoblə beṇə' napəch yelə' gwnabia' cle ca le', de'e na'anə' bzo cuine' testigw gwne': "Guaquəczə can' nia'anə' chedə' zoa' naca' Dioz." <sup>14</sup>Gwne': "De'e li goncza' par niç gaquə güen chio'. Na' de'e li goncza' par niç xi'in dia chio'onə' əsa'aque' beṇə' zan." <sup>15</sup>Na' sša gwzo de'e Abraannə' benlilažə'əteze' Diozən' xte que bžin ža goc can' ben Diozən' lyebe len le'. <sup>16</sup>Benəçhən' chəsə'əzoe' jorament chəsə'əne' de que be'enə' chnabia'ach ca lega'aque' gwnežjue' castigw chega'aque' šə cui so'one' complir can' choso'ozoe' jorament. Chso'one' ca' par niç beṇə' ca' chsa'acyožə lega'aque' se'ejle'e chega'aque' na' yesyə'əyacxenlažə'e. <sup>17</sup>Beṇə' ca' chon Diozən' cuent zjənaque' xi'in dia che de'e Abraannə' laogüe de'en chso'onlilažə'e Diozən', Diozən' bene' par niç nitə'əchgüe' segor de que guaquəczə can' bene' lyebe, na'

bito chšə'e can' bansi'e xneze gone'.

De'e na'anə' bzo cuine' testigw gwne': "Guaquəczən chedə' zoa' naca' Dioz." <sup>18</sup>Ca naquə Diozən' bene' lyebe na' leczə bzo cuine' testigw gwne': "Guaquəczə can' nia'anə' chedə' zoa' naca' Dioz", bene' ca' par niç nezecho de que caguə de'e te can' gwne'enə'. Na' bito chac güe'e dižə' güenlažə'. Diozən' bene' lyebe na' bzo cuine' testigw par niç bito žebcho sino yebeicho de'en nezecho žjəyezochə len le', chio'o bagwṇabechone' bezilixene' xtołə'əchon'. <sup>19</sup>Na' de'en nezecho žjəyezochə len Diozən' bito chac chop lažə'əcho sino zotezə zochə chonlilažə'əchone' chedə' la' nezecho de que Jeso'osən' chne' fabor chio'o lao Diozən' ca bχoz əblao checho. <sup>20</sup>Jeso'osən' bazjəyezoe' gan' zo Diozən' na' chone' par niç leczə chio'o žjəyezochə len le'. Na' Jeso'osən' naque' bχoz əblao checho, ben' gwxaquə'əlebe ca bχoz Melquisedequən'.

#### Jeso'osən' naque' ca bχoz Melquisedequən'

**7** Na' Melquisedequən' goque' rei gan' nzi' Salem na' Diozən' ben' naquə le'ezelaogüe beṇə' blao gwleje' le' par goque' bχoz. Na' catə' beza' de'e Abraannə' beyož bene' gan lao rei ca' beṇə' ca' gosə'ədiləlen beṇə' Sodoma ca', bχoz Melquisedequən' jəšague' le' na' len yelə' guac che Diozən' bene' par niç goc de'e šao' de'e güen che de'e Abraannə'. <sup>2</sup>Na' de'e Abraannə' botobe' de'e ca' gosə'əban rei ca' che beṇə' Sodoma ca' na' bnite'en

ši cuen de'e naquə lebe nach gwleje' tcuenən par bnežjue'en bχoz Melquisedequən'. Melquisedequən' zeje dižə "rei beṇə' chnabia' güen". Na' gwnabile gan' nzi' Salem, na' Salemən' zeje dižə "gwnitə' beṇə' binlo". <sup>3</sup>Bito nyojən šə no goquə de'e xaxna' Melquisedequən' na' nique nyojən šə no goquə de'e xaxta'ogüe'e, na' nic nyojən batə'aquə' golje' na' batə'aquə' gote'. De'e na'anə' nezecho cuiṇə' te yełə' naquə bχoz che'enə' na' leczə de'e na'anə' gwxaquə'əlebene' ca Xi'in Diozən'.

<sup>4</sup>Le'e gon xbab de que bχoz Melquisedequən' goque' beṇə' blao. De'e na'anə' de'e xaxta'ochō Abraannə' lao ši cuen güejə de'e ca' gwleje', bnežjue' tcuenən bχoz Melquisedequən'. <sup>5</sup>Na' beṇə' ca' gwsa'aljə lao dia che de'e Lebin', beṇə' ca' besyə'əyałə' par gwsa'aque' bχoz, nyojən le'e lei de'en bzoj de'e Moizezən' de que yesə'əzi'e tcuen lao ši cuen yoguə' cuantzə de'e gotə' che beṇə' Izrael ca' yełə' la'anə'əczə yoguə'əłolga'aque' zjənaque' xi'in dia che de'e Abraannə'. <sup>6</sup>Melquisedequən' bito əṇacho golje' lao dia che de'e Lebin', pero gwxi'e tcuen lao ši cuen de'en botobə de'e Abraannə' na' len yełə' guac che Diozən' bene' par niçh goc güen che de'e Abraannə' ben' ben Diozən' lyebe əsa'ac xi'in dia che'enə' beṇə' zan. <sup>7</sup>Na' nacbia' de que Melquisedequən' zaquə'əche' cle ca de'e Abraannə' chedə' Melquisedec na'anə' gwdape' yełə' guac che Diozən' na' bene' par niçh goc de'e güen che de'e Abraannə'.

<sup>8</sup>Na' beṇə' ca' gwsa'ac bχoz segon can' na lei de'en bzoj de'e Moizezən' gosə'əzi'e tcuen lao ši cuen cuantzə bi de'en gotə' che beṇə' Izrael ca' yełə'. Bχoz ca' gwsa'aque' beṇəch na' gwsa'ate'. Pero Melquisedequən' ben' gwxi' tcuen lao ši cuen de'en botobə de'e Abraannə', cho'en dižə' che' ca beṇə' ne'e zoczə. <sup>9-10</sup>Na' ca naquə de'e Abraannə' bnežjue' Melquisedequən' tcuen lao ši cuen de'e ca' botobe' de'en gosə'əban rei ca', de'en na'anə' guaquə əṇacho de que de'e Lebin' leczə bnežjue' Melquisedequən' tcuen güejə lao ši cuen de'e ca' botobə de'e Abraannə'. Guac əṇacho ca' chedə' de'e Lebin' golje' lao dia che de'e Abraannə' la'anə'əczə bitonə' galje' catə'ən Melquisedequən' jəšague' de'e Abraannə'. De'e Lebin' goque' xa beṇə' nech ca' əgwsa'ac bχoz che beṇə' Izrael gwlaž checho ca' cana', na' lei de'en bzoj de'e Moizezən' nan de que yesə'əzi'e tcuen lao ši cuen cuantzə bi de'en de che beṇə' Izrael ca' yełə'.

<sup>11</sup>Žalə' bχoz ca' beṇə' ca' gwsa'aljə lao dia che de'e Lebin' goc so'one' par niçh yichjla'aždao' beṇə' gwlaž checho ca' əsa'aquən can' chene'e Diozən', bito byažjecho yeto bχoz žalə' ca'. Pero de'en cui goquə so'one' par niçh əsa'ac yichjla'aždao' beṇə' can' chene'e Diozən', de'e na'anə' bidə Jeso'osən' par naque' bχoz chechon' na' gwxaquə'əlebene' ca Melquisedequən'. <sup>12</sup>Jeso'osən' naquəcze' bχoz chechon' la'anə'əczə cui naque' dia che de'e Lebin'. De'e na'anə' nezecho banža' lei de'en choe' dižə' che bχoz che nasyon Izrael chechon'. <sup>13</sup>Bχoz checho

ben' cho'echo dižə' čhei, golje' lao dia čhe de'e Jodan', na' bitoch bchoj no gaque bχoz entr beṇə' ca' əgwsa'aljəch lao dia čhe de'e Jodan'.  
 14 Nezczecho de que Xanchon' golje' lao dia čhe de'e Jodan', pero de'en bzoj de'e Moizezən' le'e lein' nan de que beṇə' ca' gwsa'aljə lao dia čhe de'e Lebin' əsa'aque' bχoz.

15-16 Bχoz čhecho Jeso'osən' naque' ca bχoz Melquisedequən'. Bito golje' lao dia čhe de'e Lebin' na' bito naque' bχoz can' na lei de'en bzoj de'e Moizezən'. Naque' bχoz čhedə' bito gwzoi yelə' gotən' le', na' zocze' zejlicane. 17 Na' de'e nga nyojən can' gož Diozən' Jeso'osən' nan:

Naco' bχoz beṇə' zo zejlicane  
 na' naco' ca bχoz

Melquisedequən'.

18 Ca naquə bχoz ca' beṇə' ca' ben Diozən' mendad gwnitə' cana', bitoch none' mendad nite'e na'a čhedə' de'en gwsə'one'enə' bito zaquə'ən par əsa'ac yichjla'aždao' beṇə'chən' can' chene'e Diozən', na' bito nsa'an yelə' guac čhe Diozən'.  
 19 Leinə' bito zaquə'ən gonən par nič yichjla'aždao' beṇə' əsa'aquən can' chene'e Diozən'. Pero na'a bazo Jeso'osən' chone' par nič chac yichjla'ažda'ochon' can' chene'e Diozən'. Na' nezecho chaquəch güen čhecho cle ca čhe beṇə' ca' zjənombia' lein'. Jeso'osən' chone' par nič zocho binlo len Diozən'.

20 Na' par nič nezecho de que Jeso'osən' naque' bχoz čhechon', Diozən' bzo cuine' testigw gwne':

Naquəcze' bχozən' čhedə' zoa'  
 naca' Dioz.

21 Beṇə' ca' gwsa'aque' bχoz segon can' bzoj de'e Moizezən', Diozən'

bito gože' lega'aque' can' gože' Jeso'osən'. Nyojən' can' gože'ene', nan:

Diozən' bzo cuine' testigw gwne':

“Naquəczo' bχozən' čhedə' zoa'  
 naca' Dioz.

Na' bito gwš'a'a can' ni'anə'.

Le' naco' bχoz ben' zo zejlicane.

Naco' ca Melquisedequən'.”

22 Nezecho de que Jeso'osən' bedəlo'ine' chio'o de que Diozən' choncze' con can' none' lyebe par gaquəlene' chio'o. Na' de'en none' lyebe gone' na'a naquəchən güen cle ca de'en bene' lyebe gone' antslə.

23 Beṇə' ca' gwsa'aque' bχoz segon can' na lei de'en bzoj de'e Moizezən', gwsa'aque' beṇə'ch na' gwsa'ate', pero benitə'ətecə' lgua'aga'aque'. De'e na'anə' gwsa'aque' beṇə' zan. 24 Pero Jeso'osən' zoe' zejlicane na' de'e na'anə' zejlicane naquəcze' bχoz čhechon'. 25 Na' notə'ətezə beṇə' chse'ene'ene' nite'e binlo len Diozən', Jeso'osən' nape' yelə' guac par chocobe' yichjla'ažda'oga'aque'en con šə chso'onlilažə'ene'. Nape' yelə' guac par gone' ca' čhedə' zocze' zejlicane chṇabe' goclen lao Diozən' par yoguə' chio'o chonlilažə'əchone'.

26 Na' Jeso'os nan' naque' bχoz əblao čhechon' na' zaque'e par gaquəlene' chio'o čhedə' chone' cayanə'ən chazlažə' Diozən'. Bito bi dolə' nape', na' bito bi de'e mal chone', na' nic chone' xbab mal. Zoe' gan' zo Diozən', chṇabi'e txen len le'. 27 Bito bi xtəle'e de na' de'e na'anə' bito cheyalə' gote' bia yixə' par yezi'ixen Diozən' xtəle'enə' can' gwso'on beṇə' ca'

gwsa'ac b̄xoz segon can' na lei de'en bzoj de'e Moisezən'. Yoguə' ža zgua'atec gwso'ote' bia yixə' par niç gosə'əñabe' bezi'ixen Diozən' xtolə'əga'aque'enə' na' techlə leczə gwso'ote' bia yixə' par gosə'əñabe' bezi'ixen Diozən' xtolə' beñə' Izrael ca' yelə'. Šlinzə bnežjw cuin Jeso'osən' por ni checho catə'ən gwso'ot beñə' le' le'e yag corozən' na' bitoch gate' yeto. <sup>28</sup>Beñə' ca' gwsa'ac b̄xoz əblao segon can' na lei de'en bzoj de'e Moisezən' gwsa'aque' beñə' güen de'e mal can' zjənaquə yeziquə'əchlə beñə'. Zan iz bagoc bzoj de'e Moisezən' lei che Diozən' catə' Diozən' bzo cuine' testigw de que sele'e Xi'ine'enə' par gague' b̄xoz əblao chechon' na' gwne': "Gaguəcze' b̄xoz əblaon' chedə' zoa' naca' Dioz." Na' Xi'ine' na'anə' zocze' zejlicane, na' naquə yichjla'aždaogüe'enə' cayanə'ən chene'e Diozən'.

**Cristən' chone' par niç chac de'e cobə de'en non Diozən' lyebe gone' par gaquəlene' chio'o**

**8** Na'a ža zo b̄xoz əblao chechon', na' chi'e yoban' chnabi'e txen len Diozən' ben' naquə le'ezelaogüe beñə' bla. Lennə' naquən de'e žialaoch lao yoguə' de'en babe'echo dižə' chei. <sup>2-3</sup>B̄xoz əblao ca' beñə' ca' gwso'ot bia yixə' lo'o yo'odao' de'en gwso'on de'e xaxta'o chio'o beñə' Izrael jso'e xchenga'acquəbən' gan' nzi' "Latjə gan' zo Diozən'" par niç Diozən' bezi'ixene' xtolə'əga'aque'enə' len che beñə' ca' yelə'. Na' de'en gwso'one'enə' naquən ca de'en chac yoban' gan'

zo Diozən'. De'e na'anə' benən byen bnežjw cuin Jeso'osən' gwso'ot beñə' le' par niç naque' b̄xoz əblao chechon' gan' zo Diozən', na' chone' par niç Diozən' chezi'ixene' xtolə' chio'o chonlilažə'əchone'. <sup>4</sup>Na' bito naque' b̄xoz žalə' ne'e zoe' lao yežlyon', chedə' banitə' b̄xoz ca' beñə' ca' chjsoa' bi de'en chjsoa' lao Diozən' segon can' na lein'. <sup>5</sup>Na' yoguə'əloj de'en chso'on b̄xoz ca' beñə' ca' chso'on can' na lein', naquən latə' laszə ca naquə de'en chac yoban'. Diozən' bene' mendad len de'e Moisezən' antslə ze'e so'on de'e xaxta'o chio'o beñə' Izrael yo'o de'e lachə'anə' gan' gwso'o b̄xoz ca' par gwso'elaogüe'e Diozən', gož'ene': "Yoguə' de'en bagwnia' gonle, legonən cayanə'ən blo'ida' le' catə'ən gwzochəo lao ya'anə'." <sup>6</sup>Pero na' de'en chon Cristən' zaquə'əchən cle ca de'en gwso'on b̄xoz ca' beñə' ca' gwso'on can' na lein'. Na' leczə de'e cobə de'en chon Diozən' len chio'o naquəchən güen cle ca de'en bene' antslə, chedə' de'e xench de'en non Diozən' lyebe gone' par gaquəlene' chio'o na'a.

<sup>7</sup>Žalə' de'en ben Diozən' par goclene' beñə' Izrael gwlaž checho ca' de'e nech benən par niç gwsa'ac yichjla'ažda'oga'aque'enə' can' chene'ene', bito bsele'e Cristən' žalə' ca'. <sup>8</sup>Pero nacbia' Diozən' bito bebeine' lega'aque', nachən' gwne':

Chona' lyebe gona' to de'e cobə par gaquəlena' le'e beñə' Izrael catə' əžin ža, nada' Xanle Dioz ənia' ca'.

<sup>9</sup>Nža'an beña' len de'e xaxta'ole ca' ca tyemp catə'ən

goquælenga'aca'ane' par niçh  
besyà'əchoje' Egipton'.

Legal'aque' bito gwso'one' can'  
gwso'one' lyebe len nada'.

De'e na'anà' nada' Xanle Dìoz  
bitoch bengal'aca'ane' cas.

<sup>10</sup>Quinga gona' par gaquælena'  
le'e benà' Izrael catà'ən əžin  
žan':

Nada' Dìoz gona' par niçh šo'o  
yichjle de'e ca' nona' mendad  
gonle,

na' gona' par niçh yebeilen lo'o  
la'ažda'olen'.

Na' toza' nada' güe'ela'ole na'  
le'e gacle xi'ina'.

<sup>11</sup>Na' ni tole cui chyažjən əgwsed  
əgwlo'i ljuèžjle par niçh  
gombi'ale nada'  
chedà' cana' yoguà'əle gombi'ale  
nada',

le'le cuitec bi zaguà'əle na' len  
le'e nacle benà' blaò.

<sup>12</sup>Cana'ach bitoch gona' xbab che  
de'le mal ca' de'en babenlenà'  
chedà' ca orən' babezi'ixena'  
xtolə'əlenà'.

<sup>13</sup>Na' ca naquən' be' Dìozən' dižà'  
che de'e cobən' de'en gwne' gone'  
par gaquælene' nasyon chechon',  
nezecho chde che de'en bene'  
mendad so'one' antslə chedà'  
banaquən de'e golə na' bitoch  
cheyalə' gonchon.

**Yo'odao' de lachə' de'en gwso'on  
benə' Izrael ca gwxaquə'əleben  
ca gan' zo Dìozən'**

**9** Cana'ate ben Dìozən' mendad  
nacle so'on benà' Izrael gwlaž  
checho ca' par so'ela'ogüe'ene'.  
Na' leczə bene' mendad so'one'  
to yo'odao' par le'. <sup>2</sup>Yo'oda'onə'

goquən de lachə'. Na' lo'o cuart  
nechən' bosozoe' to candeler  
na' to mes gan' bosozoe' yetxtil  
de'en naquə par Dìozən'. Na' cuart  
nechən' nzi'in "Latjə che Dìoz".

<sup>3</sup>Na' cuart əgwchopen' nzi'in "Latjə  
gan' zoczə Dìozən'". Na' entr cuart  
ca' chopə gwze to lachə'. <sup>4</sup>Na'  
lo'o cuart əgwchopen' bosozoe'  
yeto mes de or gan' bosozoye'  
yal. Na' gosə'əyixjue' to caj na'  
bosozoguzje' doxenən or. Na' lo'o  
caj na' bosozoe' to yesə' de or  
gan' bosozə'e yelə' guao de'en  
gwza' yoba de'en nzi' mana, na'  
leczə lo'o caj na' gosə'əgüe' e garrot  
che de'e Ronnə' de'en bexejə.

Na' leczə na' bosozə'e yej ta'a  
ca' gan' byoj de'en ben Dìozən'  
mendad so'one' par niçh gaquælene'  
legal'aque'. <sup>5</sup>Na' lao tap che cajən'  
bosozonite'le chopə lgu'a' lsaquə'  
angl benà' gosə'əzi' querobines. Na'  
gan' zjəzecha querobines ca' chey  
che'eni'in, par niçh nachbia' de que  
Dìozən' zoe' na'. Toe' gwzecha  
šyichjən na' yetoe' yešyichjən. Na'  
lao tap che cajən' entr legal'aque'  
nzi'in "Latjə che yelə' cheyašə'  
cheži'ilažə' che Dìozən'". Pero  
bitoch che'enda' güe'echa' dižə' che  
to to de'e ca'.

<sup>6</sup>Na' beyož banitə' cuart ca' na'  
beyož bosozonite'le yoguə' de'e  
ca' lo'inə', yoguə' ža ja'ac bəox ca'  
lo'o cuart nechən' gan' gwso'one'  
can' ben Dìozən' mendad so'one'  
par əso'ela'ogüe'ene'. <sup>7</sup>Na' cuart  
əgwchopen' tozə bəox əblaon' goc  
gwyo'e ze tğüiz güeje. Na' catə'ən  
gwyo'enə' benən byen bexe'e chen  
che bia yixə' bže'en lao cajən par  
niçh Dìozən' bezi'ixene' xtolə'enə'

na' bezi'ixente' xtolə' beṇə' ca' yelə'. <sup>8</sup>Na' de'en cui gotə' lsens šo'o nochlə beṇə' lo'o cuartən', Spirit che Diozən' chzejni'in chio'o de que bito gaquə šo'ocho gan' zo Diozən' žalə' ne'e chone' mendad gaquə yoguə'əlo' de'en gwsə'one' lo'o yo'odao' de'en nsa' chopə cuart. <sup>9</sup>Na' yo'oda'onə' len yoguə' de'e ca' gwsə'on bχoz ca' lo'inə' chlo'in chio'o zocho ṇa'a can' naquə yoban' gan' zo Diozən'. De'e zan de'en gwsə'on de'e xaxta'ocho ca' gwsə'ela'ogüe' Diozən' lo'o yo'oda'onə' pero bito beyac yichjla'ažda'oga'aque'en can' chene'e Diozən' la'anə'əczə boso'onežjue' Diozən' bi de'en boso'onežjue'ene' na' la'anə'əczə gwsə'ote' bia yixə' par gwsə'elaogüe'ene'. <sup>10</sup>De'e ca' boso'onežjue' Diozən' gwsə'acquən no nis yelə' guao na' no bia yixə'. Na' de'e zan costombr chega'aque' gotə' par gwsə'a gosə'əyib cuinga'aque'. Na' yoguə' de'e ca' gwsə'one' niç cuerp chega'aque'ena' goquən xi'ilažə' can' na lein'. Yoguə' de'e ca' gwsə'one'ena' gwsə'onən žin xte catə'an bselə' Diozən' Cristən' par bene' de'e zaquə'əche.

<sup>11-12</sup>Pero bazo Cristən' ṇa'a naque' bχoz əblao chechon' na' chone' par niç chac güen can' gwnitə' de'e xaxta'ocho ca' lez gaquə. Babeyepə' yoban' na' zoe' gan' zo Diozən'. Na' gan' zoe'ena' gwxaquə'əleben ca cuart əgwchope che yo'odao' che beṇə' Izrael ca', pero naquəchən de'e zaquə'əche na' de'e güen ch clezə ca de'en gwzo che bχoz ca' cana', la' bito naquən de'e ben

beṇəch. Na' Cristən' zaque'e par gwyo'e gan' zo Diozən' chedə' bnežjw cuine' gwsə'ot beṇə' le' na' blalj xchene'ena' le'e yag corozən'. Bito ṇacho bete' no šib o no go'oṇ dao' na' blalje' xchembən' par niç be'en Diozən'. Šlinzən' gwdixjue' xtolə'əchon' len xchene'ena' par zejlicane. <sup>13</sup>Ca naquə de'e xaxta'ocho ca' bito gwsə'aque' xi'ilažə' can' na lein' šə bagosə'əgane' no beṇə' guat. Na' par niç besyə'əyac cuerp chega'aque'ena' xi'ilažə' de'e yoblə can' na lein', bχoz ca' boso'ože'e lega'aque' no xchen šib o no xchen go'oṇ na' len de de'en gwche' catə'an cheyož chosə'ozeye' baquə' dao'. <sup>14</sup>Pero xchen Jesocristən' de'en bedəlalje' par beque'e xtolə'əchon' zaquə'əchən ca xchen bia yixə' ca'. Xtolə'əcho na'anə' benən par niç goccho ca beṇə' guat len yichjla'ažda'ochon', pero ṇa'a baben Jesocristən' par niç naquə yichjla'ažda'ochon' xi'ilažə' niç cho'ela'ocho Diozən' ben' zo zejlicane. Spirit che Dioz nan' goclenən Jeso'osən' par ben cuine' lažə' na' Diozən' par gwdixjue' xtolə'əchon'. Na' ca naquə Jeso'osən' bitoczə bi bi xtole'ena' gotə'.

<sup>15</sup>Na' de'en bedəlalj xchen Cristən' gwzoloao chac de'e cobən' de'en chon Diozən' lyebe gone' par chaclene' chio'o. Na' bachac de'e cobən' par niç ca' baltezə beṇə' bagwlej Diozən' žjəsyə'ənite'e len le' zejlicane. De'en bedəlalj xchen Cristən' gwdixjue' lente de'e mal ca' bencho žlac ne'e chac de'e neche de'en ben Diozən' lyebe gone' par goclene' de'e xaxtao' chio'o beṇə'

Izrael. <sup>16</sup>Catə' to beṇə' babene' testament, bito gaquə can' na testamentən' xte catə'əch ñezechō de que bagote'. <sup>17</sup>Na' ca naquə testamentən' bito gaquə can' nanṇə' žlac ñe'e mban be'lenə' ben ĩen. Catə' bagote' cana'anə' gaquə can' nanṇə'. <sup>18</sup>Na' par niç gwzōlao goc de'e neche de'en ben Diozən' lyebe gone' par goclene' de'e xaxta'ocho ca', bene' mendad bosō'olalje' xçhen bia yixə'. <sup>19</sup>De'e na'anə' catə' de'e Moizezən' beyož be'elene' beṇə' ca' dižə' çhe yoguə'əloĵ de'en ben Diozən' mendad so'one' can' na lei çhe'lenə', nach de'e Moizezən' bže'e lega'aque' xçhen go'on dao' na' xçhen šib nach nis. Bže'e lega'aque' de'e ca' len latə' yišə' xa xilə' de'en mben color əxna na' len to xis yixə' dao' de'en naquə ca gwreg. Na' leczə bže'en ĩibrən' gan' nyoj ĩeinə'. <sup>20</sup>Na' de'e Moizezən' gože' lega'aque': "Chen ni ben Diozən' mendad əgwža'a le'e par niç gone' can' none' lyebe gone' par gaquəlene' chio'o." <sup>21</sup>Nach bža'ate'en yo'odao' de lachə'ən na' len yesə' ca' na' ša' ca' de'en bosō'ochine' gan' gwsō'ela'ogüe' Diozən'. <sup>22</sup>Lei de'en bzoj de'e Moizezən' benən mendad bosō'ože'e chennə' par niç zan de'en bosō'ochine' gwsa'aquən xi'ilažə' can' na ĩein'. Diozən' bito bezi'ixene' xtolə' beṇə' žalə' cui bosō'olalje' chen çhe bia yixə'.

**De'en bnežjw cuin Cristən'  
gwsō'ote'ene' chac cheque'e  
xtolə' chio'o chonĵilazə'əchone'**

<sup>23</sup>De'e na'anə' benən byen bosō'ože'e xçhen bia yixə'ən de'e

ca' besə'əchine' lo'o yo'oda'onə' par niç gwsa'aquən xi'ilažə' can' na ĩein'. Pero xçhen bia yixə' ca' bito gaquə gonən ca gaquə yichĵila'azda'ochon' can' chene'e Diozən' par niç šo'ocho gan' zo'e'lenə'. Tozə xçhen Jesocrist nan' zaquə'ən par chonən ca chac yichĵila'azda'ochon' can' chene'e Diozən'. <sup>24</sup>Catə' Cristən' gwdixjue' xtolə'əchon' bito gwyo'e lo'o cuart əgwchope çhe yo'oda'onə' can' gwsō'on bxož ca' cana' sino beyepe' yoban' gan' zo Diozən', na' na' zocze' ña'a chne' fabor chio'o lao Diozən'. Na' cuart əgwchope çhe yo'odao' çhe beṇə' Izrael na'anə' gwzōn par bzejni'in chio'o can' naquə gan' zo Diozən'. <sup>25</sup>Bxož əblao ca' ze tgüüz güejə gwsō'e lo'o yo'oda'onə' gan' nzi' latjə gan' zoczə Diozən' bosō'ože'e chen çhe bia yixə'. Pero Cristən' bito byažjən əgwnežjo cuine' so'ote'ene' zan las. Šlinzən' blalj xçhene'lenə' par gwdixjue' xtolə'əchon'. <sup>26</sup>Žalə' byažjən laljə xçhene'en zan las, babnežjw cuine' zan las dezd catə'ən gwxe yežlyon' žalə' ca'. Pero caguə ca'anə'. Bnežjw cuine' šlinzə catə'ən bžin or çhe'lenə', na' de'en gwsō'ote'ene' šlinzə cana', gwdixjue' xtolə'əchon' zejlicane. <sup>27</sup>Na' Diozən' bansi'e xneze de que əžin ža sa'at to to beṇəçhən' na' šlinzən' sa'ate'. Na' techlə əṇa Diozən' çhe to toga'aque' šə yesə'əzi'e castigw o šə ñite'e mbalaz len ĩe'. <sup>28</sup>Na' ca de'en sa'at beṇəçhən' šlinzə leczə šlinzən' bnežjw cuin Cristən' gwsō'ote'ene' gwdixjue' xtolə' beṇəçhən'. Nach əžin ža yide' de'e yoblə, caguə par çhixjoche' xtolə'əchon' sino par

nich deyexi'e beṇə' ca' chəsə'əbeza batə'aquən' yide'enə'.

**10** Lei de'en bzoj de'e Moisezən' chzejni'in chio'o latə'əlaszə che de'e güen de'en gaquə checho catə' yežincho yoban' gan' zo Diozən'. Pero leinə' bito goquə gonən par nich yichjla'aždao' beṇə' ca' gwsə'on can' nannə' əsa'aquən can' chene'e Diozən', la'anə'əczə gwsə'ote' bia yixə' yoguə' iz par bezi'ixen Diozən' xtolə'əga'aque'enə'.<sup>2</sup> Žalə' de'en gwsə'ote' bia ca' benən par nich cuich so'one' de'e malən' bitoch besə'əyazjene' so'otəche'eb žalə' ca'. Pero de'en gwsə'acbe'ine' ne'e chso'one' de'e malən' nachən' yoguə' iz gwsə'ote'eb.<sup>3</sup> Na' de'en gwsə'one' ca' bito gwsə'anlaže'e de que zjənapə' dolə'.<sup>4</sup> Na' gwsə'one' ca' yoguə' iz chedə' chen che no go'onn dao' o no šib bito zaquə'an par yeca'an xtolə' beṇə'.

<sup>5</sup>De'e na'anə' catə' Cristən' bide' yežlyo nga gože' Xe' Diozən':

Nezda' to de'en chazlažə'əcho' mazəchlə ca bia yixə' bian' chso'ot beṇə' par chso'ela'ogüe'e le', na' mazəchlə ca bichlə de'en chso'one' le'.

De'en chazlažə'onə' əgwnežjo cuina' par chixjua' xtolə' beṇə'.

<sup>6</sup>Leṇṇə' de'en chebeido' mazəchlə ca bian' chso'ote' par choso'ozeye', na' mazəchlə ca xchen bia yixə' de'en chəsə'əlalje' catə' chəsə'əṇabe' yezi'ixeno' xtolə'əga'aque'enə'.

<sup>7</sup>De'e na'anə' goža' le' can' nyojən le'e librən' gan' nan:

“Dioz chia', za'a nga zedəyena' con can' chazlažə'onə'.”

<sup>8</sup>Zgua'atec Cristən' gože' Xe' Diozən': “Nezda' de'en chazlažə'əcho' na' de'en chebeichdo' ca de'en chso'ote' bia yixə' na' ca bichlə de'en chso'one' le', na' ca de'en choso'ozeye' bia ca' chso'ote' na' leczə ca de'en chəsə'əlalje' xchenga'acobən' par chəsə'əṇabe' chezi'ixeno' xtolə'əga'aque'enə'.” Gwne' ca' la'anə'əczə lei de'en bzoj de'e Moisezən' benən mendad gwsə'ote' bia yixə' na' gwsə'one' bichlə de'e ca' gwsə'one'enə'.<sup>9</sup> Nach Cristən' gože' Diozən': “Nada' za'a zedəyena' con can' chazlažə'onə'.” De'e na'anə' nezecho de que Diozən' bitoch chene'ene' gotcho bia yixə' can' na lein' chedə' Cristən' bagwdixjue' xtolə'əchon'.<sup>10</sup> Cristən' bene' con can' gwyazlažə' Diozən'. Šlinzən' bnežjw cuine' gwsə'ot beṇə' le' par beyone' yichjla'aždao' yoguə' chio'o chonlilažə'əchone' xi'ilažə'.

<sup>11</sup>Beṇə' ca' zjənaquə bəxoz, yoguə' ža nitə'ətezə nite'e chso'ote' bia yixə' par xtolə' beṇə' Izrael ca' yelə', len la' xchen bia yixə'an bito gaquə yeca'an xtolə' beṇə'.<sup>12</sup> Pero na' Cristən' bnežjw cuine' šlinzə par gwdixjue' xtolə'əchon'. Na' beyožən' zjəyechi'e gan' chnabi'e len Diozən'.<sup>13</sup> Na' zoe' na' chbeze' əžin ža nitə' yoguə' de'e ca' chso'on contr le' na' beṇə' contr che' ca' xni'enə'.<sup>14</sup> Na' de'en gwdixjw Cristən' xtolə'əchon' šlinzə cana', na' beyone' yichjla'aždao' yoguə' chio'o chonlilažə'əchone' xi'ilažə', leczə babene' par nich chac yichjla'ažda'ochon' can' chene'e Diozən' gaquən zejlicane'.<sup>15</sup> Na'



caguə nadə'əza' cho'a dižə' che de'e ca'. **Ľeczə Spirit che Diozən'** benən ca byojən ca' par niç **nezecho** naquən de'e li, nan:

**16** Quinga nona' lyebe gona' len **lega'aque'** catə' əžin žan':  
Nada' Dioz gona' par niç šo'o yichjga'aque' de'e ca' nona' mendad so'one',  
na' gona' par niç  
yesyə'əbeine'en lo'o  
la'ažda'oga'aque'enə'.

**17** Nach nyoj yeto de'en nan:  
Cuatəch žjsa'alaža'a che de'e mal ca' bagwso'one' na' che xtolə'əga'aque'enə'.

**18** Na' catə' babezi'ixen Diozən' xtolə'əchon', bitoch chyažjecho gotcho bia yixə' par ənabcho yezi'ixene'en.

**Cheyalə' socho güe'ela'ocho Diozən' na' goncho orasyon laogüe'enə'**

**19** Na'a ža benə' bišə', laogüe de'e blalj Jesocristən' xchene'enə' par gwduxjue' xtolə'əchon' gwaquəczə šo'ocho gan' zo Diozən' sin cui žebcho. **20** De'en ben Jesocristən' par niç šo'ocho gan' zo Diozən' naquən to de'e cobə la' antslə "Latjə gan' zo Diozən'" lo'o yo'oda'onə' bgašə'an len to lachə'. Pero na'a de'en bnežjw cuin Jesocristən' por ni chechon' bito bi de de'en chcuašə'an latjə gan' zo Diozən' yoban' len chio'o chonlilažə'əcho Jesocristən'. **21-22** Na' de'en naquə Jesocristən' bħox əblao checho, na' de'en chaclene' chio'o naccho ca family che Diozən', de'e na'anə' cheyalə' socho güe'ela'ocho Diozən' na' goncho orasyon laogüe'enə' do yichj do

lažə'əcho, gonlilažə'əchone' sin cui gaquəžejlažə'əcho. Goncho ca' laogüe de'en blalj xchen Jesocristən' par beque'e xtolə'əchon'. Na' **Ľeczə** bagwchoacho nisən'. **23** Na' can' gwzolaoco chonlilažə'əcho Jesocristən', ca'aczən' cheyalə' sotezə socho gonlilažə'əchone' na' yebeicho de'en žjəyzecho len le', chedə' la' Diozən' ben' ben lyebe žjəyzecho len le', chone' complir can' ne'enə'. **24** Na' **Ľeczə** cheyalə' güe'e ljuežjcho balor par niç gaquəchecho che ljuežjcho na' gonchcho de'e güen to yetocho. **25** Na' bito cuejyichjcho de'en chdopcho txen par cho'ela'ocho Diozən', can' chso'on balə benə' chəsə'əbejyichje'en. Cheyalə' gwtiplažə' ljuežjcho par niç sochcho chech gonlilažə'əcho Cristən'. Gonchcho ca' chedə' bazon baozə yidə Cristən' yeto.

**26** Na' šə chio'o cuejyichjcho dižə' li che Diozən' de'en banombi'acho par gontezcho de'e malən', bitoch gaquəlenən chio'o de'en blalj xchen Jesocristən' par beque'e xtolə'əchon'. **27** Na' šə goncho ca', cheyalə' žebcho castigw de'en gon Diozən' chio'o, chedə' notə'ətezcho choncho contr le' əsele'e chio'o lo'o yi' gan' cuiayi'icho. **28** Ca naquə benə' ca' chsa'aque' bitobi zaquə' lei de'en bzoj de'e Moisezən' na' bito choso'ozenague' chei, benə' gwlaž checho ca' chso'ote' lega'aque' sin cui chesyə'əyaše'ene' lega'aque', con šə nitə' chopə o šonə testigw benə' chso'e dižə' de que de'e malən' bagwso'one'. **29** Pero chio'o ža šə gue'icho Xi'in Diozən' na' Spirit che'enə' de'en nži'ilažə'

chío'o, zaquə'əczən par si'icho castigw gualəch, na' le'egatezə ca' šə gaquecho cui bi zaquə' xchene'enə'. Lənnə' bedəlalje' par nič gwzolaο chac de'e cobə de'en ben Diozən' lyebe gone' par chaclene' chío'o na' bedəlalje'en par nič yichjla'aždao' chío'o chonlilažə'əchone' beyaquən xi'ilažə'. <sup>30</sup>Nəzecho de que Diozən' gwne': "Nadan' co'olažə'a beņə' ca' chso'on contr nada' na' nadan' gonga'aca'ane' castigw." Na' leczə nyojən nan: "Diozən' gwnežjue' castigw che beņə' ca' bagwcue'e ca' xi'ine' šə so'one' de'e malən'." <sup>31</sup>Na' šə cuejyichjcho Diozən' ben' zo zejlicane, lechgualə de'e žebcho ca naquə castigon' de'en gone' chío'o.

<sup>32</sup>Lə'e žjsa'alažə' can' bchejele la'anə'əczə de'e zan de'e gwdi' gwxaquə'əle ca tyempən' catə'an ze'le gwzolaο gwyejni'ile che Cristən'. <sup>33</sup>Besyə'əbei beņə' contr chele ca' boso'ogüie' can' bžaglaole catə'an boso'ožia boso'onitele le'e na' catə'an gosə'əque'e de'en gotə' chelen'. Na' leczə bchejele par beņle txen len beņə' ljuežjcho ca' catə'an goc chega'aque' ca'. <sup>34</sup>Beyašə' beži'ilažə'əle ljuežjcho ca' beņə' ca' gwsa'atə' ližya na' gwzole mbalaz la'anə'əczə gosə'əca' beņə' de'en gotə' chele, chedə' la' gwnezele de que laogüie de'en chonlilažə'əle Cristən' de de'e zaquə'əche chele yoban' de'e cui te chei. <sup>35</sup>Na'a ža, bito cuejyichjle ca de'en chonlilažə'əlene', chedə' gwžin ža catə' sole mbalaz. <sup>36</sup>Bito žjxaquə'əlažə'əle par yeyož gonle yoguə'əloj can' chene'e Diozən' la' šə gonle can' chene'ene'enə'

žjəyezole len le' zejlicane can' bene' lyebe. <sup>37</sup>Nyojən can' gwna Diozən' nan:

Ləchgualə lgüegwzə əžin ža catə' yidə ben' əselə'a, na' bito šeichene'.

<sup>38</sup>Na' beņə' ca' zjənaque' beņə' güen laogua'anə' cheyalə' nitele so'onlilažə'e nada'.

Na' beņə' ca' chəsyə'əbižə' cuich chso'onlilažə'e nada', bitoczə yebeiga'acda'ane'.

<sup>39</sup>Pero na' chío'o ža, bito nacho naccho ca beņə' ca' chəsyə'əbižə' cuich chso'onlilažə'e Diozən', beņə' ca' yesə'əbiayi'. Chío'o zotezə zocho chonlilažə'əchone' na' de'e na'anə' nəzecho žjəyezochə len le' zejlicane.

Diozən' chebeine' beņə' laogüie de'en chso'onlilažə'ene'

**11** De'en chonlilažə'əcho Diozən' nəzecho guaquə de'en chbezcho gaquə, na' nəzecho de'e liczə can' na Diozən' che de'e ca' cui chle'icho. <sup>2</sup>Na' beņə' ca' gwnitə' gwwalte, bebei Diozən' lega'aque' laogüie de'en gwso'onlilažə'ene'.

<sup>3</sup>Na' de'en chonlilažə'əchone' chejni'icho de que con bene' mendad goc yoban' na' yežlyon'. Bito bi bchine' par bene'en.

<sup>4</sup>Na' ca naquə de'e Abelən', de'en benlilažə'e Diozən', goque' beņə' güen lao Diozən' na' bebei Diozən' de'en bnežjw de'e Abelən' le' cle ca de'en bnežjw de'e Cainə'. Na' la'anə'əczə cuich zo de'e Abelən', de'en benlilažə'e Diozən' chzejni'in chío'o de que can' cheyalə' goncho.

<sup>5</sup>Na' Enoquən' leczə benlilažə'e Diozən', na' de'e na'anə' Diozən'

bezi' beque'ene' sin cui gote'.  
 Notoch no ble'i le'. Na' nyojən che'  
 de que chebei Diozən' le' antslə  
 ze'e yezi' yeque'ene'. <sup>6</sup>Diozən' bito  
 chebeine' notə'ətezə beṇə' cui  
 chonlilažə' le'. Na' šə no güe'elao'  
 le', cheyalə' šejle'e de que zoczə  
 Diozən' na' de que gwzenagczə  
 Diozən' che' šə bi de'en ənabene' le'  
 do yichj do laže'e.

<sup>7</sup>Na' ca naquə de'e Noen' ža, leczə  
 benlilaže'e Diozən'. Na' Diozən'  
 bosnisene' le' can' ze'e gaquə na'  
 de'e Noen' gweyjele'e che'. De'e  
 na'anə' Noen' bene' to barcw gan'  
 gwyo'e len family che' ca' par nich  
 bito gwsa'ate' len nisən'. Na' yelə'  
 chonlilažə' che'enə' len Diozən'  
 blo'in beṇə' ca' yeziquə'əchlə gwža'  
 yežlyon' de que gwsa'ape' dolə'. Na'  
 leczə de'en benlilaže'e Diozən', de'e  
 na'anə' Diozən' gwne' che' de que  
 naque' beṇə' güen laogüe'enə'.

<sup>8</sup>Na' de'en benlilažə' de'e  
 Abraannə' Diozən', bzenague'  
 catə' Diozən' bene' mendad šeje'  
 zitə'. Na' gan' gweje' Diozən'  
 blo'ine' le' yežlyon' de'en gaquə  
 che'. Na' gweje' la'anə'əczə bito  
 nombi'e latjən' ca orən'. <sup>9</sup>Na' de'en  
 benlilažə' de'e Abraannə' Diozən',  
 gwzoe' laž beṇə' zitə' gan' ben  
 Diozən' lyebe gwnežjue' xi'in dia  
 che' ca'. Na' de'e Abraannə' gwzoe'  
 lo'o yo'o de lachə'əzə, na' leczə  
 lo'o yo'o de lachə'əzə gosə'ənitə'  
 de'e xi'inə' Isaaquən' na' de'e xi'in  
 xesoe' Jacobən', beṇə' ca' leczə  
 gosə'əbeze' gwnežjo Diozən' xi'in  
 dia chega'aque' ca' yežlyon'. <sup>10</sup>Bito  
 bi goque de'e Abraannə' de'en  
 gwnite'e lo'o yo'o de lachə'əzə,  
 chedə' gwzoe' lez əžin ža soe' gan'

zo Diozən', gan' naquə to syoda  
 güen de'e cui te chei, syoda de'en  
 ben Diozən'.

<sup>11</sup>Na' ca naquə de'e Sar no'ol che  
 de'e Abraannə', benlilaže'e Diozən'  
 na' de'e na'anə' Diozən' bene' par  
 nich bi'e bdao' na' gwxane'ebo'  
 la'anə'əczə cuich zoe' xlaogüe'e  
 sane'. Diozən' bene' ca' len de'e  
 Sarən' chedə' Sarən' gweyjele'e  
 de que Diozən' gone' can' bene'  
 lyebe. <sup>12</sup>De'e na'anə' la'anə'əczə  
 de'e Abraannə' naque' beṇə' golə  
 par so xi'inə', xi'in dia che' ca'  
 gwsa'aque' beṇə' zan can' zjənaquə  
 beljw ca' de'en zjəžia le'e yoban'  
 na' can' naquə yox de'en chi' cho'a  
 nisdə'onə', notono no gaquə gwlabə'  
 xi'in dia che'enə'.

<sup>13</sup>De'e Abraannə', de'e Isaaquən'  
 na' de'e Jacobən', na' nochlə beṇə'  
 ca', ne'e chso'onlilažə'əcze' Diozən'  
 catə' bžin ža gwsa'ate' la'anə'əczə  
 cuiṇə' gac can' ben Diozən' lyeben'.

Bito gwsa'aczejlaže'e, sino que  
 gwse'ejle'ecze' de que gwžin  
 ža gone' can' gwne'enə'. Na'  
 lega'aque' gwsa'acbe'ine' de que  
 zjənaque' ca beṇə' zitə' len beṇə'  
 ža' lao yežlyon' na' de que bito  
 bi lažga'aque' de lao yežlyo nga.  
<sup>14</sup>Na' de'en gwsa'aque' cui bi  
 lažga'aque' de lao yežlyon', nacbja'  
 de que gwse'enene' yesə'əžine' ga  
 yoblə gan' gaquə lažga'aque'enə'.  
<sup>15</sup>Žalə' gwsə'one' xbab che yežən'  
 gan' gwsa'alje' de que naquən  
 lažga'aque'enə', zjəsyə'ənitə'əlje' na'  
 žalə' ca'. <sup>16</sup>Pero gwsə'one' xbab de  
 que yoban' naquən lažga'aque'enə'  
 na' gwse'enchgüeine' yesyə'əžine'  
 na', chedə' la' güench naquən  
 cle ca yežlyon'. De'e na'anə'

Diozən' bito cheto'ine' c̄hega'aque' par ənə' de que naque' Dioz c̄hega'aque' ben' chso'elaogüe'e, na' le' babenšaogüe'e to syoda par lega'aque'.

<sup>17-18</sup>Na' ca naquə de'e Abraannə' benlilaže'e Diozən', de'e na'anə' bzenague' catə' Diozən' benene' prueb gože'ene': "Bet xi'ĩnə' Isaaquən' can' choto' bia yixə' ca' na' chlajjo' xchenga'aguəbən' par cho'elaog'o nada'." Na' gwņeze de'e Abraannə' de que Diozən' bene' lyebe len le' de'e zan de'e güen de'e gaquə por xi'ĩn dia che'enə'. Na' che bi'i nan' gož Diozən' de'e Abraannə': "Xi'ĩn dia che Isaac na'azə gona' cuent lao dia chio'onə'." Pero bia'aczə bzenag de'e Abraannə' ca de'en gož Diozən' le' got xi'ĩne' tlišə'ənə'. Na' bžin orən', Diozən' bito be'e latjə gote'ebol'. <sup>19</sup>De'e Abraannə' bzenague' par gote'ebol' c̄hedə' gwņezene' de que Diozən' chac yosbane' beņə' guat ca'. Na' ca naquə Diozən' bito be'e latjə gote' xi'ĩne'enə' guac ənacho de que Diozən' bosbane'ebol' ladjo beņə' guat ca'.

<sup>20</sup>Nach leczə de'e Isaaquən' benlilaže'e Diozən', na' de'e na'anə' gwņabene' Diozən' gone' güen len xi'ĩne' ca' de'e Jacobən' na' de'e Esa'on'. <sup>21</sup>Lezczə de'e Jacobən' benlilaže'e Diozən', na' de'e na'anə' catə' bazon gate' gwņabene' Diozən' gone' güen len xi'ĩn xesoe' ca', xi'ĩn de'e Jwsen'. Na' bchequə' yichje'enə' be'ela'ogüe'e Diozən' žiaša'atezə garrot che'enə'. <sup>22</sup>Na' de'e Jwsen' lezczə benlilaže'e Diozən' na' gwyejle'e de que əžin ža yesyə'əchoj beņə' Izrael ca' Egipton'

can' ben Diozən' lyebe. De'e na'anə' catə' bazon gate' bene' mendad yesyə'əyo'e žit che cuerp che'enə' catə' žjəya'aque' Canaanə'.

<sup>23</sup>Na' catə' goljə de'e Moizezən', de'e tant gwso'onlilažə' de'e xaxne'e ca' Diozən', bito besə'əžebe' so'one' contr can' ben de'e rein' mendad so'one' ca de'en gože' beņə' Izrael ca' so'ot bi'i c̄hega'aque' ca'. Šonə bio' bosocuaše'e de'e Moizezən' ližga'aque'enə', c̄hedə' gwsa'aque' nacbo' xochechgua. Na' catə' bitoch goquə yoso'ocuaše'ebol', xi'ĩn rein' beque'ebol' boscha'ogüe'ebol'. <sup>24</sup>Na' catə' bagwcha'o de'e Moizezən', benlilaže'e Diozən' na' de'e na'anə' bito gone'ene' gague' cuent ca bi'i che de'e xi'ĩn Rei Faraonə'. <sup>25</sup>Gwyazlažə'əche' bžaglaogüe' txen len beņə' Izrael ca' ca de'en gosə'əzaquə'əzi' gosə'əzaquə'əyaše'e, cle ca gone' bi de'en chəsyə'əbei beņə' mal ca' chso'one', la' de'e te chei de'e ca'. <sup>26</sup>De'en bžaglao de'e Moizezən' gwxaquə'əleben ca de'en gwxaquə'əzi' Cristən'. Na' gocbe'ine' de que de'e zaquə'əche əžaglaogüe' yoguə' de'e ca' cle ca si'e doxen yelə' gwni'a che Egipton'. Gwņezene' gwžin ža catə' gon Diozən' par ničh soe' mbalaz. <sup>27</sup>Na' de'en benlilaže'e Diozən' bito bžebe' rein' catə' bžin ža besyə'əchoje' Egipton' la'anə'əczə rein' bža'achgüe' lega'aque'. Na' de'e Moizezən' gwlo'o gwchejlaže'e len de'e ca' bžaglaogüe' lao bene' par besyə'əchoje' Egipton' c̄hedə' gwņezene' zoczə Diozən' len le' ca nacho chle'iczene' le'. La'anə'əczə Diozən' cui no chac le'i le'.

<sup>28</sup>Na' de'e Moisezan' de'en benlilaže'e Diozən' bene' mendad len to to family beṇə' Izrael ca' gws'o'ote' xilə' dao' ca' can' gož Diozən' le' na' bos'o'oze'e xchenga'acquəbən' ližga'aque'enə' par niç anglən' ben' bselə' Diozən' bito bete' bi'i nech ca' lao yoguə' family çhega'aque'enə'. <sup>29</sup>Na' beṇə' Izrael ca' de'en gws'onlilaže'e Diozən', Diozən' bene' par niç Nisdao' Exṇan' goquən çhoplə xte bla' yo biž par niç goc gosə'adie' yešl'alə. Pero na' beṇə' Egipto ca' catə' gwsa'aclaže'e yesə'adie', beyejw nisən' gan' çhəsə'adi'enə' na' gwsa'ate' gwse'ejə' nisən'.

<sup>30</sup>Na' leczə de'en gws'onlilažə' beṇə' Izrael ca' Diozən', de'e na'anə' Diozən' bene' par niç bebixə ze'e de'en gwyechj doxen syoda Jericon' catə' beṇə' Izrael ca' jəsə'əžçhje'en yoguə' ža lao gažə ža. <sup>31</sup>Na' de'e Raabən' no'olən' goquə sargat antslə, leczə benlilaže'e Diozən'. Na' de'en benlilaže'ene' bito gwžiaye'e len beṇə' Jerico ca' beṇə' ca' cui bos'o'ozenag çhe Diozən', çhedə' le' ža bgüialaogüe' beṇə' Izrael ca' liže'enə' beṇə' ca' jəsə'əgüia jəsə'əye' laže'enə'.

<sup>32</sup>¿Bichxan' ənia' ža? Bito nlatja' par gua'a dižə' çhe de'e Gedeonnə', çhe de'e Baraquən', çhe de'e Sansonnə', çhe de'e Jeften', çhe de'e Dabin', çhe de'e Samuelən' na' çhe yeziquə'əchlə beṇə' ca' gwsoe' xtižə' Diozən' cana'. <sup>33</sup>Na' laogüe de'en gws'onlilaže'e Diozən' balə' besə'əchoje' gws'o'one' gan catə' gosə'ədiləlene' no rei, na' yebalə' gws'o'one' byen par niç beṇə' yoblə gws'o'one' de'en naquə de'e

güen. Na' yebalə' ben Diozən' lyebe gone' to de'e gone' len lega'aque' na' goc can' bene' lyeben', nach leczə yebalə' Diozən' bene' par niç bež əznia ca' cui bi gws'o'one'eb lega'aque'. <sup>34</sup>Na' leczə de'en gws'onlilaže'e Diozən', balə' bito gwse'eye' lo'lo yi'inə', na' yebalə' besyə'əla catə' gwse'ene'e beṇə' so'ote' lega'aque' len spadən', na' yebalə' bnežjw Diozən' lega'aque' fuers balor catə' cui bi fuers çhega'aque' gotə', na' yebalə' gwsa'aque' soldad gual, na' yebalə' gws'o'one' gan soldad zitə' beṇə' besə'əžin gosə'ədiləlene' lega'aque'. <sup>35</sup>Gwnitə' no'olə gws'onlilažə' Diozən' na' laogüe de'en gws'onlilaže'ene'enə' bosbane' no family çhega'aque' ladjo beṇə' guat ca'.

Na' gwnitə' beṇə' gws'onlilažə' Diozən' na' bito gwse'enene' yesə'əbejyichje'ene' par yesyə'əchoje' lao de'en çhəsə'əçhi' çhəsə'əsaquə' beṇə' lega'aque', çhedə' gwnite'e lez yolis yosban Diozən' lega'aque' ladjo beṇə' guat ca' par žjəsyə'anite'e len le'. <sup>36</sup>Na' gwnitə' beṇə' lechgualə gosə'əzi'ichižə' beṇə' lega'aque' na' gws'o't gosə'əyine' lega'aque' na' bos'o'ocheje' lega'aque' gden, na' gosə'əyixjue' lega'aque' ližya. <sup>37</sup>Na' beṇə' mal ca' bos'o'šiče'e balə beṇə' ca' chso'onlilažə' Diozən' yej, na' bos'o'ozoxje' cuerp çhe yebalə' len syer, na' gosə'əgo'oyele'e yebalə' par yesə'əbejyichje' Diozən', pero bito gosə'əbejyichje'ene', na' gws'o'ote' yebalə' len spad. Na' balə beṇə' ca' gws'onlilažə' Diozən' gwsa'aše' yixə' zjənyaze'

no xa xilə' na' no xa šib. Bitobi bi gotə' čhega'aque'. Lechguale nyašə' goc čhega'aque'. Na' lechguale bosə'očhi' bosə'osaquə' beŋə' lega'aque'. <sup>38</sup>Gosə'əlaže'e do latjə dašən' na' do ya'adao' na' do ga ze bļoj na' ga zo no liž bia yixə'. Yoguə' de'e ca' goc čhe beŋə' ca' gwsə'onlilažə' Diozən', len la' zjəzaquə'əche' lao Diozən' cle ca yoguə' beŋə' ca' cui gwsə'onlilaže'ene'ena'. <sup>39</sup>Na' la'anə'əczə bebei Diozən' yoguə' beŋə' ca' gwsə'onlilažə' le', bito bene' ca gaquə yoguə'əloj de'e ca' bene' lyebe žlac gwnitə' lega'aque'. <sup>40</sup>Diozən' bito gone'ene' gaquə čhe lega'acze' de'en bene' lyebe, sino bene' par nich txen len lega'aque' bagoc čhecho can' bene' lyebe gaquə par nich chac yichjla'ažda'ochon' can' chene'ene'ena', na' lechguale mbalaz can' bene'ena'.

**Cheyalə' sotezə socho goncho xbab čhe Jeso'osən'**

**12** De'en gwsə'on yoguə' beŋə' ca' gwsə'onlilažə' Diozən' žlac gosə'əbane' yežlyo nga chzejni'in chio'o can' cheyalə' gonlilažə'əchone'. De'e nan' cheyalə' gwcui'izəcho ca'alə šə bi de'en chžon par gonlilažə'əchcho Diozən', na' cuejyichjcho šə bi de'e mal de'en choncho. Na' cheyalə' co'o gwčhejlažə'əcho len bitə'ətezə de'e chac čhecho par nich sotezə socho gonlilažə'əcho Diozən' na' goncho can' ne'ena'. <sup>2</sup>Cheyalə' sotezə socho goncho xbab čhe Jeso'osən' čhedə' tozə le' chonlilaže'e Diozən' cayanə'ən cheyalə' gonlilažə'əchone'

chio'o. Gwneze Jeso'osən' ze'e gon Diozən' par nich soe' mbalaz len le', na' de'e na'anə' gwlo'o gwčhejlaže'e de'en gwxaquə'əzi'e catə'an gwsə'ot beŋə' le' le'e yag corozən' na' be'e latjə beya' gwsə'one beŋə' ca' le'. Pero na'a chi'ilene' Diozən' yoban' na' chəsə'ənable' txen.

<sup>3</sup>Cheyalə' goncho xbab čhe Jeso'osən' can' gwlo'o gwčhejlaže'e len yoguə' de'en gwsə'on beŋə' mal ca' contr le' par nich co'o gwčhejlažə'əcho na' cui gaquecho zdebə goncho can' chene'e Diozən'. <sup>4</sup>Na' chio'o ža, de'e zan babžaglaecho čhedə' choncho xte ga zelao chzaque'echo par cui choncho de'e malən', pero notononə' got chio'o. <sup>5</sup>Cheyalə' žjsa'alazə'əcho de que Diozən' chone' chio'o consejw can' chso'on beŋə' len xi'ingə'aque'. Na' consejon' chone' chio'o nyojən nan:

Xi'indaogua'a, bito gaquele de que cui bi zejen ca de'en chona' castigw čhelen' catə' chonle bi de'e malən', na' bito gaquele tolə catə' chdila' le'e, nada' naca' Xanle.

<sup>6</sup>De'e na'anə' nada' chnežjua' castigw čhe beŋə' ca' chacda' čhei catə' chso'one' de'e malən', na' chona' par nich chəsə'əžaglae beŋə' ca' bagwcuə'a ca xi'ina' catə' cui choso'ozenague' čhia'.

<sup>7</sup>De'e nan' ža, Diozən' chone' chio'o castigw čhedə' chosgole' chio'o can' chso'on benəchan' chosyo'osgole' xi'ingə'aque'ena' bi'i chsa'aque'ne' čhei, chso'one' castigw čhega'acbo' catə' chso'ombo' de'e malən'. <sup>8</sup>Na'

šə cui bi castigw checho' chon  
 Diozən' catə' choncho de'e malən',  
 zeje dižə' de que bito naccho xi'ine',  
 la' yoguə' chio'o bagwcue'e ca xi'ine'  
 catə' choncho de'e malən' chone'  
 castigw checho. <sup>9</sup>Xaxna'acho ca'  
 bosyo'osgole' chio'o yežlyo nga na'  
 gwso'one' castigw checho che bi de'e  
 mal de'en bencho na' bzenagcho  
chega'aque'. Naquəchxe cheyałə'  
 əgwzəxjw yichjchon' gwzenagcho  
 con bin' əna Xacho Diozən' ben'  
chon yełə' mban zejlicane che  
 chio'o chonlilažə'əchone'. <sup>10</sup>Na'  
 xaxna'acho ca' lao to chop izən'  
 gwso'one' castigw checho con can'  
 gwnan chega'aque'enə'. Pero na'  
 Diozən' chone' chio'o castigw parzə  
 nič gaquəlene' chio'o, par nič  
 ca' gaccho beṇə' la'aždao' xi'ilažə'  
 can' naque'enə'. <sup>11</sup>Na' lao orən' bito  
 chazlažə'əcho bitə'ətezə castigw  
 de'en chaccho. Pero galj chdelə  
 cheyacbe'icho naquən' goncho chedə'  
 castigw de'en chaccho chaclenən  
 chio'o par nič sotezə socho goncho  
 de'e güennə'.

**Diozən' gone' castigw checho  
 šə cui gwzenagcho che'**

<sup>12</sup>De'e na'anə' lesotezə leso  
legonlilažə' Diozən' na' le'e co'o  
 gwchejlažə' bitə'ətezə de'en  
 chy' de'en chzaquə'əle. <sup>13</sup>Leso  
legon con can' chene'e Diozən'.  
Legonən par nič beṇə' ljuežjle ca'  
 yoso'ozenaguəche' che Diozən' caguə  
 ca yesə'əxope' so'onche' de'e malən',  
chedə' bale' cuinə' yoso'ozenague'  
che yoguə'əloł de'en chene'e Diozən'  
 so'one'.

<sup>14</sup>Legon ga zelao saque'ele par  
 nič sole binlo len yoguə' beṇə'

chso'onlilažə' Jesocrstən'. Na'  
lecə legüe' latjə par nič Diozən'  
 gone' la'ažda'olen' xi'ilažə', chedə'  
 notono no yežin gan' zo Diozən'  
 šə cui naquə la'ažda'ogüe'en  
 xi'ilažə'. <sup>15</sup>Bito güe'ele latjə par  
 nič tole cuejyichjle cuich talenle  
 Diozən', la' Diozən' nži'ilažə'əchgüe'  
 yoguə'əcho. Na' šə tole cuejyichjle  
 Diozən', nxož yoguə'əle gonle ca'.  
<sup>16</sup>Bito co'o xtole o cuejyichjle be'en  
chele o no'ol chele par solenle beṇə'  
 yoblə. Na' bito gue'ile de'en naquə  
 de'e zaque'e lao Diozən'. Nezecho  
 de'e Esa'on' por to yełə' guao na'azə  
 bete'e de'en banaquən gwnežjo  
 Diozən' le' de'en golje' naque' beṇə'  
 nech. <sup>17</sup>Nezele de que gwdechlə  
 gone'ene' yeyac lao ne'e de'en bdie'  
 lao na' beṇə' biše'enə', pero bito  
 goquə bi gone' par nič yeyaquən  
 lao ne'enə' la'anə'əczə gwchežə'  
 tant gone'ene' yeyaquən lao ne'enə'.

<sup>18</sup>Nža'alə chac che chio'o na'a cle  
 ca can' goc che de'e xaxta'ocho ca'  
 catə'ən Diozən' bnežjue' lega'aque'  
lei che'enə'. Betje' lao ya'a Sinain'  
 na' gwyechj yi' bel' lao ya'anə',  
 na' gwxoan žen, na' beyaquən  
 žčhol, na' gwyechjchgua be'. <sup>19</sup>Na'  
 gwse'enene' gwchež to trompet,  
 na' lecə gwse'enene' be' Diozən'  
 dižə' len lega'aque'. Pero de'e tant  
 besə'əžebe' xte gwsa'atə'əyoine'  
 de'e Moisezən' par nič ye'e Diozən'  
 cuich güe'elene' lega'aque' dižə'.  
<sup>20</sup>Lechgualə besə'əžebe' por ni  
che de'en gož Diozən' lega'aque'  
 antslə de que šə no beṇə' žjəbigue'e  
 ya'anə' par yesə'əgüie' laogüen'  
 yoso'ošič'ene' yej, na' lecə  
 ca' so'onene' šə bia yixə'. <sup>21</sup>Na'  
nezecho lechgualə de'e zaquə'

žebchon' goquæcə lao ya'a Sinain',  
 çhedə' len de'e Moizezən' gwne':  
 "Lechgualē chaž chžeba' can' chac."  
<sup>22</sup>Pero ŋa'a ža chio'o banaccho  
 txen len Diozən' ben' zo  
 zejlicane na' len yoguə' angl  
 zan çhe' ca' beŋə' ca' že' yoban.  
 Na' yoban' gwxaquə'əleben ca  
 syoda Jerosalennə' na' ca ya'a  
 Sionnə'. <sup>23</sup>Na' naccho txen len  
 yoguə'əlołte beŋə' yeziquə'əchlə  
 beŋə' ca' leczə chəsə'ədopə  
 chəsə'əžag chso'elaogü'e  
 Jesocrstən', na' yoguə'əcho len  
 lega'aque' gwxaquə'əlebecho ca  
 to beŋə' goljə nech lao to family  
 laogüe de'en naccho beŋə' blao  
 lao Diozən', na' yoguə'əcho nyoj  
 lachon' le'e libr çhe Diozən' de'en  
 de yoban'. Naccho txen len Diozən'  
 ben' əchoglaogüe'en çhe yoguə'əloł  
 beŋəçən' šə zjənaque' beŋə' güen  
 o šə zjənaque' beŋə' mal. Leczə  
 naccho txen len beŋə' ca' bagwsa'at,  
 beŋə' ca' gwsə'onlilažə' Cristən'  
 lao gwnite'e yežlyon'. Diozən'  
 babene' par niç yichjla'aždao'  
 lega'aque'enə' banaquən' cayanə'an  
 chene'ene' əsa'aquən. <sup>24</sup>Na'a ža  
 zocho txen len Jeso'osən' çhedə'  
 le'enə' bedəlalj xçhene'enə' par  
 niç gwzolao chon Diozən' de'e  
 cobə de'en none' lyebe gone' par  
 gaquəlene' chio'o. Na' xçhen  
 Jeso'osən' de'en bedəlalje' catə'an  
 gwsə'ote'ene' chlo'in de que  
 Diozən' chezi'ixene' xtołə' con beŋə'  
 chso'onlilažə' Jeso'osən'. Caguə  
 can' naquən len xçhen de'e Abelən'  
 de'en gwłaljən', çhedə' lennə' con  
 blo'en de que de'e malən' ben beŋə'  
 biše'enə' bete'ene'.

<sup>25</sup>Naquən de'e žialao xen  
 gwzenagcho çhe xtižə' Diozən'.  
 Nezecho de que bnežjue' castigw  
 çhe de'e xaxta'ocho ca' catə'an  
 gwsa'aque' godenag len xtiže'enə'  
 de'en be' de'e Moizezən' len  
 lega'aque'. Pero gonche' castigw  
 çhe chio'o šə cui gwzenagcho  
 çhe xtiže'enə' de'en bedəzejni'i  
 Xi'inə' ben' zo yoban'. <sup>26</sup>Lechgualē  
 gwxo' catə' Diozən' betje' yoban'  
 par bžine' lao ya'a Sinain' gan'  
 be'elene' beŋə' Izrael ca' dižə'anə'.  
 Na' gwdechlə gwne': "Gwžin ža  
 cata' yossil'insa' yežlyon' de'e yoblə,  
 pero caguə yežlyo na'azən' sino  
 que lenczə de'e ca' chle'icho le'e  
 yoban'." <sup>27</sup>Na' de'en gwne' de que  
 yossil'inse'en de'e yoblə, zejen de  
 que cana'achən' te çhe yoguə' de'e  
 ca' ben Diozən' de'en chle'icho, ca  
 naquə yežlyon' na' de'e ca' chle'icho  
 le'e yoban'. Na' catə' babesyə'anit  
 yoguə' de'e ca' chle'ichon' Diozən'  
 ne'e zocze' chone' par niç chac  
 de'e güen de'e cui te çhei. <sup>28</sup>De'e  
 na'anə' cheyałə' güe'echo yełə'  
 choxcwlen çhe Diozən' ca de'en  
 cui te çhe de'e mbalaz de'en  
 chac lo'o yichjla'aždao' chio'o  
 chonlilažə'əchone'. Na' leczə  
 güe'etecho yełə' choxcwlen çhe' ca  
 de'en cui te çhe de'en žjəyecho  
 len le' zejlicane. Cheyałə' gapcho  
 Diozən' respet na' güe'ela'ochone'  
 can' chazlaže'enə'. <sup>29</sup>Nezecho ca  
 naquə yi'inə' chzeyən bitə'ətezə,  
 na' ca'aczən' chon Diozən', chone'  
 castigw çhe bitə'ətezə de'e mal  
 de'en chon chio'o beŋəç, çhedə'  
 lechgualē chgüe'ine' bitə'ətezə de'e  
 malən'.



## De'en chazlažə' Diozən' goncho

**13** Cheyalə' sotezə socho gaquecho che yeziquə'əchlə beṇə' chso'onlilažə' Jesocristən', chedə' yogue'le zjənaquə' bišə'əcho na' zanchō. <sup>2</sup>Cheyalə' əggüialaocho beṇə' zita' ližchon' na' gonga'acchone' goclen. Baļə xaxta'ocho ca' catə' bosə'əgüialaogüe' beṇə' zita' na' bosə'əgüialaogüe' angl che Diozən' sin cui gwsa'acbe'ine'.

<sup>3</sup>Cheyalə' gaquəlencho beṇə' ljuežjcho ca' chsa'atə' ližya chedə' txennə' chžaglaolenga'acchone' šə bi de'e chac chega'aque'. Na' leczə ca' gaquəlencho beṇə' ljuežjcho ca' šə no choso'ochi' choso'osaquə' lega'aque'. Leczə gwžinlja ža chi' saquə' chio'o zocho yežlyo nga.

<sup>4</sup>Na' le'e nšagna'ale yoguə'əle leso do lažə'əle len no'ol chele o be'en chele, can' chene'e Diozən', na' bito talenle notə'ətezəchlə beṇə'. Diozən' əgwnežjue' castigw che beṇə' ca' chəsə'əgo'o xtoi, na' beṇə' ca' chəsə'əbejyichj no'ol chega'aque' o be'en chega'aque' par chəsə'anitə'əlene' beṇə' yoblə.

<sup>5</sup>Bito cheyalə' selažə'əcho gaccho beṇə' gwni'a. Cheyalə' socho mbalaz len de'en de checho, chedə' cuin Diozən' bagwne' chio'o: "Bito ganlaža'a le'e na' bito cuejəyichja' le'e." <sup>6</sup>De'e na'anə' bito de de'e žebcho. Quinga guac əṇa to tocho:

Xana' Diozən' zoe' chaclene' nada'.

Na' bito žeba' šə bi de'en gone beṇə'chən' nada'.

<sup>7</sup>Legon xbab che beṇə' ca' boso'osed boso'olo'i le'e xtižə'

Diozən', beṇə' ca' cuich nitə' ṇa'a. Lega'aque' gosə'əzo gosə'əbeze' binlo yežlyo nga, na' cheyalə' sole gonlilažə'əle Diozən' can' gwnitə' lega'aque' gwso'onlilažə'ətezene'.

<sup>8</sup>Can' naquə' yichjla'aždao' Jesocristən' nej nase, ca'aczən' naquən ṇa'a, na' ca'aczən' gaquən zejllicane. <sup>9</sup>Beṇə' zan choso'osed choso'olo'ine' che Cristən' pero na' nža' xen can' choso'osed choso'olo'i baļe'. Bitō güe'ele latjə yesə'əxoayague' le'e len xtižə'əga'aque'ena'. Zaquə'əchən si'icho yeļə' chaclen che Diozən' lo'o yichjla'ažda'ochon' par nich sotezə socho gonlilažə'əchone' cle ca cue' yichjcho che bi de'en chəsə'əna beṇə' cheyalə' ye'ej gaocho. De'en che'ej chaochon' bito chaclenən' yichjla'ažda'ochon'.

<sup>10</sup>Nezecho de que Jesocristən' bagwdixjue' xtolə'əchon' le'e yag corozən'. Pero na' beṇə' ca' ne'e chso'ot bia yixə' na' choso'ozeye'eb chsa'aquene' par yezi'ixen Diozən' chega'aque'ena', bito chaclenən' lega'aque' ca de'en gwduxjw Jesocristən' xtolə' chio'o beṇə'ch.

<sup>11</sup>Bxoz ca' chso'ote' bia yixə' ze tgüiz güe'jə chəsə'əṇabe' yezi'ixen Diozən' xtolə' yoguə' beṇə' lao ṇasyon chechon', na' chjgua' bxoz əblaon' chennə' lo'o cuart gan' nac che Diozən', pero cuerp chega'aquəbən' choso'ozeye'len fuerlə syoda. <sup>12</sup>Na' can' goc che Jeso'osən', gwso'ote'lene' fuer syodan', na' yoguə' beṇə' so'onlilažə' Jeso'osən' yeyac la'ažda'oga'aque'en xi'ilažə' por ni che de'en blaļj xchene'ena'. <sup>13</sup>De'e na'anə' cheyalə' gonlilažə'əcho

Jesocristán' na' bitoch ñaacho de'e ca' la'añə'əczə šə beñə' zan yesə'əgue'ine' chio'o de'en cuich ñaochon. <sup>14</sup>Gatə'tezə zocho yežlyo nga, de'e te chein', pero chbezcho yežincho yoban' na' žjəyezochō syodan' de'e cui te chei. <sup>15</sup>Laogüe de'en babocobə Jesocristán' yichjla'ažda'ochon' cheyalə' güe'echo yełə' choxcwlen che Diozən' dote tyemp na' güe'ela'ochone' len xtižə'əcho. <sup>16</sup>Cheyalə' sotezə socho goncho yoguə' claste de'en naquə güen na' cheyalə' əgwnežjwcho con ja'aquə' guac əgwnežjwcho par gaquəlencho beñə' ca' cui de chega'aque', chedə' can' chene'e Diozən' goncho.

<sup>17</sup>Le'e əgwzəxjw yichjle na' le'e gwzenag che beñə' ca' bagwlej Diozən' par choso'osed choso'olo'ine' le'e na' par chəsə'əgüia chəsə'əye' le'e. Lega'aque' chsa'aclene' le'e par niç ca' gonlilažə'əchle Diozən', na' cheyalə' yoso'odie' cuent laogüe'enə' can' chonle. Legwzenag chega'aque' par niç yesyə'əbeine' catə' yoso'odie' cuentən' na' cui yesə'ənite'e trist. Na' šə cui gwzenagle chega'aque' bitobi de'e güen gaquə chele.

<sup>18</sup>Legon orasyon par neto'. Zoa' segor de que chonto' can' chazlažə' Diozən', na' chene'eto' gonto' porzə de'e güen. <sup>19</sup>Che'enchgüeida' gonle orasyon chia' par niç yob gaquə yidəcha' gan' zolen'.

**Chñabe' gaquəlen Diozən' lega'aque'**

<sup>20</sup>Laogüe de'en bnežjw cuin Xancho Jesocristán' blalj

xchene'enə', chac chon Diozən' de'en none' lyebe gone' par gaquəlene' chio'o. Na' cuat əžin ža cuich gone' can' bene' lyebe gone'. Xancho Jesocristán' gwxaquə'əlebene' ca to beñə' goye xilə' tant nzi'ilaže'e chio'o. Diozən' bolis bosbane'ene' ladjo beñə' guat ca', na' Dios na'aczən' chone' par niç chzo chbezcho binlo len xbab de'en yo'o lo'o yichjla'ažda'ochon'. <sup>21</sup>Laogüe' nan' chona' orasyon chñaba' əgwletje' xbab güen lo'o yichjla'ažda'olen' na' gaquəlene' le'e par niç gonle yoguə'əlol can' chene'ene' gonle. Na' chñaba' gone' ca gombi'achle Jesocristán' par niç ca' gaquə yichjla'ažda'olen' con can' chazlažə' Diozən'. Ledoye'ela'och Jesocristán' na'a na' zejlicane. Na' can' gonšgaczo.

<sup>22</sup>Legon xbab che yoguə' consejw quinga de'en babəna' le'e, chedə' bitotec bzoja' dižə' zan che to ton. <sup>23</sup>Na' chyixjue'ida' le'e de que Temtion' babechoje' ližyan' na' chbeza'ane' nga. Na' šə yob yełe'e nach chi'ane' catə' delana'a le'e.

<sup>24</sup>Por part nada' le'e gguap diox beñə' ca' bagwlej Diozən' par choso'osed choso'olo'ine' le'e na' par choso'ogüia choso'oye' le'e. Na' leczə ca' le'e gguap diox yoguə' noquə'əchlə beñə' nitə' na' beñə' bagwlej Diozən' par zjənaque' lažə' ne'enə'. Na' beñə' ljuežjcho ca' za'ac Italian' choso'oguape' le'e diox.

<sup>25</sup>Diozən' gaquəlenšgue' le'e. De'e na'azə de'e əchnia'.